

SAN JUAN

Moocaani Iimaa Cristo. Jaabofeenedi Miyaminaaco Fiivusuuhi.

1 Iticoni paryi fanoova fiivuutinaaca Moocaani Iimaa icacuui. Jaabo toono Iimaa Moocaanima icauhi Cristo. Jaabo bu diibo Moocaani.
² Miiro iticoni diibo Moocaanima icauhi. ³ Diibofeenedi Moocaani paryi fanoovaaco eetavuuhi; miiro chahano aivo diibofeenedi eheetavuutino iicano^a ⁴ Diiboma icano fiivo. Jaano toono fiivo miyaminaadi aachicinino iicauno. ⁵ Jaano cívonofañoti achicíhi. Jaanoco icivo jabacarutihi.

⁶ Miiro icaubo saafi Moocaani agalluubo Jua onoobo. ⁷ Jaabo saauhi diibo aachiciibo iicaubediti ijjibeguequi. Jaabo ijjibogonofeenedi miyaminaa imiyaaveguequi. ⁸ Jaabo diibo Jua aachiciibo icatino. Jilli aachiciibo iicaabo jibogominaafiti iicaqui agalluubo. ⁹ Jaanoti jino imiya achici, miyaminaaco aachiciniibo, jino jinijehallivi gasefivucuui.

¹⁰ Miiro jaabo johono Iimaa iicaabo jino jinijehalliri icacuui. Jaabofeenedi Moocaani jinijeque eheetavehinirunofaño jinijeminaa diiboco gaajautihi. ¹¹ Miiro ijjinijevi sauruubo. Jaaruuboco miyaminaa diiboco gaayiciutihi. ¹² Jaarunofaño saatoho diiboco agaayicimoro miyaaveguehi. Jaamoco ficuubo Moocaani seemeti iicaqui. ¹³ Jaano miyaminaati saatíhi miyaminaati ifiivomo icatino, bu gaifi iimoyicínoti icatino jilli Moocaanitiro diibo seemetiro minifutucuumo.

¹⁴ Jaabo johono Iimaa iicahiniibo miyaminaafi ifiti iminiyuuboro mofeeneri icauhi, miyaanoma, igajjima icano. Jaabo imico miíhai mahatyimeuhi, diibo idiiboro Moocaani Seemene iicaabo imico. ¹⁵ Miiro diibediti Jua ijjibuguubo nuuhi: Jaani diibo diiboti uujoho unuubo taabuunati asaabo tajanaanici iicaabo, uujoho chahaunaacaro iicacumaño, nooboro. ¹⁶ Miiro jaaboti paryi miíhai diiboma síhidi iicanoti magaayicíhi diibo imino aacínoco siino dojicuti, siino dojicuti icano. ¹⁷ Miiro Moisefeenedi Moocaani tajíba saauhi. Jaanoti gajji, miyaano icano Jesucristofeenedi saahi. ¹⁸ Miiro miíhaiñooba Moocaanico atyimetihi, idiiboro Illi Caanifaño iicaabo, diibo miíhaico Caanico gaajasuhi.

Jua Nitiminaafi Jesucristoti Jibeguehi.

(Mt 3.11-12; Mr 1.7-8; Lc 3.15-17)

¹⁹ Jaanaa Jerusale cuumiri iicaumo judiomi sacerdotemico, levitamico icano galluui Juajaago diiboco: ¿Miíjoho ijjoho? noomoro idilluui.

²⁰ Jaamoco diibo imino jibuguuhi: Uujoho Cristo icatíhi, nooboro.

²¹ Jaanegui siino diiboco dilluumo: ¿Jaanaa miijoho ijoho? ¿Nacu Moocaani iimaaminaafi, Elia? noomoro.

Jaanegui Jua nuuhi: Chahano uujoho diibo icatihi, nooboro.

Jaanegui diiboco nuumo: ¿Nacu ijoho oono Moocaani iimaaminaafi asaajiibo? noomoro.

Jaanegui nuubo: Chahano, nooboro.

²² Jaanegui diiboco nuumo: Jaanaa miijoho ijoho mihaico diibogo, oono mihaico agalluumoco mijibeguequi milli difiiti ijoho neehi, noomoro.

²³ Jaanegui Jua diitoco nuuhi: Uujoho sicaihigovi ocoovadiicinibo: Aivojibedi jihaico sanoticovoro mihimibachu, onoobo Moocaani iimaaminaafi Isaia unuubadi, nooboro.

²⁴ Jaamo diito Juama ihiimaatumou fariseomi agalluumo. ²⁵ Jaamo diiboco nuuhi: Jaabogahabu Cristo idiicatiibo, bu Elia idiicatiibo, bu johono Moocaani iimaaminaafi idiicatiibo icano, ¿collihi jana nitihicahi? noomoro.

²⁶ Jaanegui Jua diitoco nuuhi: Uujoho nifaihuriro nitih. Jaanoti amihafeeneri iicaabo saafi amihai magajatiibo. ²⁷ Jaabo taabuunati asaabo tajanaanicivi iicaabo, diibovi uujoho ifototih. Jaamaño diibo tihapaaje duujeque sinaayujitirahi, nooboro.

²⁸ Paryi jino jilli icauhi Betabara onoomañovi, Jordan onoohi onegueehivi Jua initihicauhigo.

Jesu Guijevefenedi Mohimiti Buusucafetehi.

²⁹ Jaano sifucuti Jua, Jesu diibojaa asaaboco aatyimeuboro nuuhi: Memeeeci jaani Moocaani Cordero, iguijevefenedi jinijeminaa imitico ubuusujiiibo. ³⁰ Johono uujoho diiboti ihiimaabo: Taabuunati saajiibo tajanaanicivi iicaabo uujoho chahaunaacaro iicacumaño. ³¹ Uujoho icaruubo diiboco gaajahinitih. Jaanoti naha uujoho nifaihuri nitiiboro saahi Israel cuumiminaa diiboco igaajaqui, nooboro.

³² Jaadi bu siino nuubo: Uujoho atyimehi Moocaani Gajjaco nimihubadi jeevaabo diibohallivi niquejefañoti iniitooboro iicanoco. ³³ Jaaruuboco uujoho gaajahicatih miijoho diibo iicanoco; jilli naha uco nifaihuri nitiqui agalluubo nuuhi: Tagaija cajaanihallivihacho iniitooboro iicaabo diibo tagajari initijiibo, nooboro nuuhi. ³⁴ Jaaboco atyimecuuhi. Jaamaño uujoho jibeguehi diibo miyaano Moocaani Achi iicanoco, nooboro.

Iticonioto Jesu Jiibogominaa.

³⁵ Jaano sesevede siino Jua tomañeri icauhi miimisiici jiiibogominaatisima. ³⁶ Jaabo Jesu afatyunoco aatyimeuboro nuuhi: Memeeeci ajaani Moocaani Cordero, nooboro.

³⁷ Jaanoco Jua jiibogominaatise uguubuumisiro Jesu dojicuti fuuhi.

³⁸ Jaanegui Jesu dojicuco emeeeciuboro, diibo dojicuti ufuunoco aatyimeuboro diitisico nuuhi: ¿Jinejeque miguinehi? nooboro.

Jaanegui nuumisi: ¿Jiibogominaafi, cuuca diicafihi? noomisiro.

³⁹ Jaanegui Jesu diitisico nuuhi: Juu masaa. Jaamisiro memeeeci, nooboro.

Jaanegui ufuumisi atyimeuhi diibo icahicauhigoco. Jaamisiro mihijicuuneguiiha tufucu diiboma icaumisi.

⁴⁰ Jaamisi diitisi Juati uguubuumisiro Jesuma ufuumisiti saafi momo Andre, Simon Pedro nahabo. ⁴¹ Jaabo Andre jinejeque moonitiiboro

inahabo Simonco iguiinutuuboro diiboco nuuhi: Meeci mahatyimecuuhi Mesia Cristo onooboco, nooboro. Mesia, Moocaaniti asaabo ihaivojiisucuqui, eneejiruno.

⁴² Jaaboro Andre Simonco satyuuhi Jesu iicauhigo. Jaaboco Jesu aatyimeuboro nuuhi: Iijoho Simon Jona achi, jaaruubo jisumitiro dimemeji Cefa, nooboro. Jaarunaa Cefa onoono jilli momoro, Pedro eneejiruno.

Jesu Coovahi Felipe Natanae Icamísico.

⁴³ Jaano sесеvedí Jesu imuguuhi Galilea jiiñjevi ufuunoco. Jaabo Felipeque aatyimeuboro diiboco nuuhi: Tadyojicuti disaa, nooboro.

⁴⁴ Jaabo Felipe Betsaida cuumioobou. Jaacuumiri tolliro Andre, Pedro icamísi icahicauhi. ⁴⁵ Jaabo Felipe Natanaeque iicñjeuboro nuuhi: Miihai mahatyimecuuhi, diibediti Moise itajiiba aamefaño acaatiniuboco. Tolliro Moocaani iimaaminaa diibediti acaatiniiboco. Jaabo Jesu, Jose Nazareoobo achi, nooboro.

⁴⁶ Jaanegui Natanae nuuhi: ¿Nacu Nazare cuumiti iimino saajirahi? nooboro.

Jaanegui Felipe diiboco nuuhi: Eneecau maha memecitequi, nooboro.

⁴⁷ Jaanaa Jesu Natanae asaunoco aatyimeuboro nuuhi: Jaadi juuga saabo miya israelminaafi abañifitatiibo, nooboro.

⁴⁸ Jaanegui Natanae diiboco dilluui: ¿Milliti uco gaajahi? nooboro. Jaanegui Jesu diiboco nuuhi: Miiro ico uujoho atyimehi Felipe ico coovatinaacaro higuerahoguiino diicaaboco, nooboro.

⁴⁹ Jaanegui Natanae diiboco nuuhi: Jiiibogominaafi iijoho Moocaani Achi, iijoho israelmi aivojiibo, nooboro.

⁵⁰ Jaanegui Jesu diiboco nuuhi: ¿Jilli iijoho uco miyaaveguehi, ico higuerahoguiino diicaaboco atyimehi eneenguiiharo? Imi jino janaanici icanehejeque daatyimeji, nooboro.

⁵¹ Tolliro bu Jesu nuuhi: Miyanotiro amiihaico neehi: Mahatyimeji niqueje faayicininoti Moocaani toomominaa uujoho Miyaminaafibadi Ifiivuubohallivi iniitocinimoro bu caamovi focinimoco, nooboro.

Cana Onoocuumi Jiibaimo.

2 Jaanobuunati mifucuci, safucu icano taabava jiibaimo icauhi Cana cuumivi Galilea jiiñjevi. Jahi Jesu seeji diitofaño icauhi. ² Jahi tolliro Jesuco ijiibogominaama cuhuvaumo tobaimovi. ³ Jaanaa diito aduta vino ifinicuunegui Jesuco seeji nuuhi: Vino finicuui, noogoro.

⁴ Jaanegui Jesu diigoco nuuhi: ¿Gaha, collihi jaanoco uco neehi? Toonovihi ifototihi, nooboro.

⁵ Jaarunaa diigo nuuhi diito jeecevominaaco: Paryi diibo amiihaico onoonoco momooni, noogoro.

⁶ Jaanaa tomañeri icauno sahuse juugahuseti sañu icano iciñuuno. Tuñuujefaño judiomi iicanicibadi ifiinoco iimibachuqui nifaihunoco ificuhicañuue. Jaano sañufaño fine ifetehicauno ochenta o cien litrodino nifaihu. ⁷ Jaanaa Jesu diitoco nuuhi: Paryi jino iciñuunoco nifaihuneri magahafusu, nooboro. Jaanegui diito tuñuuejeque jiti jiti gahafusuui.

⁸ Jaadi Jesu diitoco nuuhi: Fine ivi jisumi miidino mihicimoro mahacito ijiibaimo toomominaafico, nooboro.

Jaanegui tolli mooniumo. ⁹ Jaafaihuco ijiibaimo toomominaafi nisuuhi vinoti minifutucufaihuco. Jaanoco gaajautiibo cuucati iiciunoco; idiimoro

diito ijeeceivominaa toonoco gaajauhi diito inifaihuco iiciumaño. Jaanegui ijiiibaimo toomominaafi tobaimo abajaaboco ocoovauboro nuuhi: ¹⁰ Iticoni famoova iimi vinoco ifefihi. Jaanoco ijiiibaimo guiraano aaducuunobuunati iimijisutinoco iifefimo. Jaanoti ijijoho aivo iiminoco ficuuhi jihachuta, nooboro.

¹¹ Jino aivo iticoni Jesu sihidi ejeevanoco omooniuo Cana cuumivi Galilea jinijevi, imityaco ifusuubo. Jaaneri ijiiibogominaa diiboco miyaavuguuhi.

¹² Jaanobuunati seeji, inahabomi, ijiiibogominaa icamoma fuubo Capernau cuumijaagovi jahi icaumo fiiva fucuva.

Jesu Templojaco Imibachuui.

(Mt 22.12-13; Mr 12.15-18; Lc 12.45-46)

¹³ Jaanaaca judiomi jiiibaimo Pascua ifiiticuuneguiiha Jesu Jerusale cuumijaagovi fuuhi. ¹⁴ Jahi atyimeubo templojafaño bueymico, ovejamico, nimiihumico icano anaajemeque. Tolliro miyaminaama nihibamico acafaryuuacumo gicinimoco atyimeubo. ¹⁵ Jaanoco aatyimeuboro Jesu gaaibaico gaiciitati eheetavuuboro tooneri diitoco isi gañiiubo, ihovejami, ibueymi icamoma. Tolliro nihibamico acafaryuuacuhicaumo nihibamico baavi fufucuubo, jaaboro imesanoco gavaracuubo icano. ¹⁶ Jaaboro bu nimiihumico anaajeumoco nuubo: iToonoco jinoti buhigovi miici! iGuihirubi ijijaco naajetajati meheetavedino! nooboro.

¹⁷ Jaanoti ijiiibogominaa esafutuuhi Caatinihaamefaño: Diijaco agaijino uco finisuhi, onoonoco.

¹⁸ Jaanegui judiomi diiboco dilluui: Eneecata mihaico siibadi iicanoco dihfusu toonoti magajaqui: Jii, olli iicaneguiiha jahi olli mooniibo meneequi, noomoro.

¹⁹ Jaanegui Jesu diitoco nuuhi: Jijia templojaco paryi magavaracu, jaajaco siino uujoho mifucuci, safucu icanoti siino boobaniji, nooboro.

²⁰ Jaanegui judiomi diiboco nuuhi: Cuarenta y seisdino ficabava nijequeti jiijaaco eetavuumo. ¿Jaajaco milli ijijoho mifucuci, safucu icanoti deetavejirahi? noomoro.

²¹ Jaarunaa Jesu ifiicoro unuuruubo: Temploja, nuuhi. ²² Jaamaño Jesu iguijeveunofeneti ubuheetusumi ijiiibogominaa tolli diibo unuunoco esafutuuhi. Jaamoro Caatinihaame onoonoco, bu Jesu ijijico icano diitoco ijiiibugunoco miyaavuguumo.

Jesu Famoovaaco Gaajahi.

²³ Pascua jiiibaimosumi Jesu Jerusaleri iicausumi, sihidi miyaminaa diiboco miyaaveguehicauihi sihidi ejeevanoco omooninoco aatyimemere.

²⁴ Jaarumovi Jesu jeevamaahicautihi famoovaaco agaajahicaumaño.

²⁵ Mihihañooba diiboco jiiibeguehicautihi: Diito jilli jeevahi, noomoro miyaminaaco diiboro agaajahicaumaño ijeebiifaño iicanoco icano.

Nicodemo Onoobo.

3 Icaubo saafi fariseomioobo Nicodemo onoobo judiomi aivojitoobo.

² Jaabo Jesujaago fucu asaaboro diiboco nuuhi: Jiiibogominaafi, mihiha magajahi ico Moocaani mihaico diibeguequi agalluunoco. Chahamo mijoho sihidi ejeevanoco ijijoho omoonibadi iicanoco omoonimo Moocaani diiboma iicatiruva, nooboro.

³ Jaanegui Jesu diiboco nuuhi: Miyanotiro ico neehi, siino dojicuviro ifiivotiibo Moocaani aivojifaño feejitíhi, nooboro.

⁴ Jaanegui diiboco Nicodemo dilluuhi: ¿Milli jaabo miyaminaafi ujusicuubo siino dojicuviro fiivejirahi? ¿Milli jaabo siino seeji jeebiifaño ijicafotooboro siino fiivejirahi? nooboro.

⁵ Jaanegui Jesu diiboco nuuhi: Miyanotiro ico neehi; nifaihuri, Moocaani Gajjari icano ifiivotiibo Moocaani aivojifaño feejitíhi. ⁶ Miyaminaafiditi ifiivoobo miyaminaafi. Jaanoti Moocaani Gajjati ifiivomo Moocaani Gajjama icahi. Toono eneejiruno Moocaani seemeti icamo.

⁷ Daabafitidino siino fiivo ico onoonoti. ⁸ Miíro guibuhuba iimogohigoti asaanoco ijoho guubufíhi. Jaaruubo gaajatihi conooti asaanoro conoovi ififotonoco. Jaabadi jeevamo paryi Moocaani Gajjari ifiivomo, milli ifiivonoco milli miyaminaa gaajajirahi, nooboro.

⁹ Jaanegui Nicodemo siino dilluuhi: ¿Milli fine jino? nooboro.

¹⁰ Jaanegui Jesu nuuhi: ¿Hijoho aivo sihidi edevaabo israelminaa jibogominaafi idiicaruubo, nacu jinoco gaajatihi? ¹¹ Miyanotiro ico neehi: Miihai mihiiamaahi magaaanoco. Jaamo miihai mijibeguehi mahatyimeneque. Jaarunoco amiihai mimiyaaveguehaticatihi miihai monoonoco. ¹² Jiinjieono icarunoco onoonoco uco mimiyaaveguehaticatihi. Jaanequi: ¿Fine millijiru niquejeonoco jibuguruva?

¹³ Miihaiñooba niquejefaño footíhi idiiboro tahigoti iniitehiniibo: Uujoho Miyaminaafibadi Ifiivuuubo niquejefaño iicaabo. ¹⁴ Miíro Moise sicaihigovi jiinimoco caamovi agañiyicubadi; tolliro uujoho Miyaminaafibadi Ifiivuuubo caamovi guijeve imohobujehallivi gañiyicicafeteji. ¹⁵ Jaaboco paryi imiyaavogomo ifinijitino fiivoma icacuuhi^b

Moocaani Jiinije Miyaminaaco Agajjino.

¹⁶ Miíro Moocaani sihidi jiinije miyaminaaco agajjiboro idiiboro iicaabo Illico aciuihi. Jaaboco paryi imiyaavogomo mitajitíhi. Jaamo ifinijitino fiivoma icaji. ¹⁷ Miíro Moocaani jiijehallivi Illico galluutíhi jiinije miyaminaaco cijjigaifaño igañisuqui. Jilli galluubo diibofenedi jiinije miyaminaa itaajaqui. ¹⁸ Jaabo Moocaani Achico imiyaavogomo cijjigaifaño ifetejitíhi. Jaanoti imiyaavogotimo cijjigaifaño ifeequi icacuuhi idiiboro Moocaani Achi iicaaboco imiyaavogotimaño. ¹⁹ Jaamo imiyaavogotimo cijjigaifaño ifeequi icacuuhi. Miíro jiinijehallivi aachiciniibo asaaboco imogotimo icivonocoro imuguumo imiticoro omoonihicaumaño. ²⁰ Miíro famoro iimitinoco omoonimo aachicinoco jiiheguehi. Jaamaño aachicininojaagovi fiitivotimo, iimitinoco omoonino foovoiivotino iicaqui. ²¹ Jaanoti miyaanoco iimogomo aachicinijaagovi fiitivehi diito omooninofaño Moocaani icano igaajacafetequi.

Jua Siino Jesuditi Onoono.

²² Jaanobuunati Jesu fuuhi jiiibogominaama Judea jiinije. Jaabo toonovi guenene icaubo miyaminaaco initiubo. ²³ Jaabadiro Jua nitihicauhi Enonvi Salim cuumi fiitino, tomañovi sihidi nifaihu iicaumaño. Jaabojaa miyaminaa ofoomoco nitihicauho. ²⁴ Jilli icaumo Jua icivojaanirautisumi.

²⁵ Jaanaaca Jua jiiibogominaa jenaucasiuhi judiomima ifiino imibachuhallivi. ²⁶ Jaamoro Juaco nuutuumo: Mojiibogominaafi, meeci

b 3.15 Sahaamefaño janaanici jilli ficuumo: finitimo icaji, onoonoco.

iima oono Jorda oonegueehi iicaubo icahi diiboti miihaico idiibuguubo. Jaabojaago sihidi miyaminaa ofoomoco nitihicaabo, noomoro.

²⁷ Jaanegui Jua diitoco nuuhi: Cajaatyobama chahajiruno gaaja Moocaani diitoco ihacitiruva. ²⁸ Miiro amiihairyo uco muguubuhinicuuhi: Uujoho Cristo icatihi jilli diibo imega uco agalluubo, nooboro eneehininoco.

²⁹ Miiro taabava jiiibaimofaño mogaima iicaabo aiji. Jaabo cojiri iicaabo jilli igataavominaafi. Jaabo diibo ihiimaanoco uguubuuboro imo imo icanicibo. Jaabadi jisumi uujoho sihidi imo imo icahi. ³⁰ Jaabo diibo jisumitiro janaanivivi bocitoobaaca uujoho jilli guinoviuro minifeteji, nooboro.

Caamoti Asaabo.

³¹ Caamoti asaabo fanoohalliviro icahi. Jaanoti jiiinijeoobo jilli jiiinjeminaafi. Jaabo jiiinjenehejequere iimaanacihi. Jaanoti niquejefañoti asaabo famoohalliviro icahi. ³² Jaabo aatyimeneti, uguubunoti icano iimaahi. Jaaruubo onoonoco miihaiñooba miyaaveguehicitih. ³³ Jaanoti saatoho diibo onoonoco imiyaavogomo: Moocaani Miyaabo iicanoco jiiibeguehi. ³⁴ Moocaani agalluubo Moocaani iijico jiiibeguehi. Jaaboco Moocaani Igaijaco finitino acihi. ³⁵ Moocaani Illico gaijihi. Jaabo usefaño Moocaani paryi fanooco ficuui. ³⁶ Jaamaño Moocaani Achico imiyaavogomo ifinijitino fiivoma icacuui. Jaanoti Moocaani Achico imiyaavogotimo fiivoma chahaji. Jilli ñihicuno Moocaani omoonjinofaño icacuui.

Jesu Samariaogoma Iimaahi.

4 Jaanaa fariseomi guubuui Jua janaanici Jesu iijibogominaama iicaabo initihicaunoco. ² Jaarunofaño Jesu nitihicautihi idiimoro iijibogominaa nitihicaui. ³ Jaanoco Jesu uguubuuboro Judeati fuuhi Galileaajaago siino ihuumiqui.

⁴ Jaabo imuguui Samaria jiiinijefenedi ufuunoco. ⁵ Jaabo ufuubo ifutuuih Scar onocuumi Samaria jiiinije cuumivi Jacob illi Joseque ijiinijeque aaciumaño fiitino. ⁶ Jaamañeri icauno nifaihuhoji Jacob oji onohoji. Jaanaa Jesu asaabo, iniinovatucunegui tohoji cojivi casiivuubo, fine gadiciiba nihiba icacuuberi. ⁷⁻⁸ Jaanaa iijibogominaa tuucuumijaago fuuhi machutaaco anaajeteumo. Jaanaa tuucuumiti saafigo gaigo saauhi toojiti inifaihuvavaugo. Jaagoco Jesu nuuhi: Uco nifaihuti daaci, nooboro. ⁹ Jaanegui diiboco samariaogo nuuhi: ¿Milli jaabo ijoho judio idiicaabo, uujoho samariaogo icagoco nifaihuco dilluuhi? noogoro. Jilli nuugo judiomi samaritanomima iimogocashicautimaño.

¹⁰ Jaanegui Jesu diigoco nuuhi: Ijoho Moocaani aacinoco gaajaruva, bu miijoho jino ico nifaihuco idillunoco gaajaruva; ijoho uco dilluruva ico uujoho buheenifaihuco acijirahi, nooboro.

¹¹ Jaanegui diigo nuuhi: ¿Aivojiiibo, nacu jinejeri jaabo inifaihuco diicijirahi aivo faicuvahoji? ¿Conooti jaabo toono buheenifaihuco diicijirahi? ¹² Miiro jino moheedebebe Jacob miihaidi jihojico ficuui, diibo iseeme, paryi ijoomi icano toojiti aaduhicauhojico. ¿Nacu jaabo ijoho diibo janaanici deevahi? noogoro.

¹³ Jaanegui Jesu diigoco nuuhi: Paryi jihoji nifaihuti aadumoco siino adufira aiveji. ¹⁴ Jaanoti uujoho aacino nifaihuco aadumoco siino ufucuro adufira aivucuujitihi. Uujoho aacino nifaihu diitofañoti finitino niivaji ifinijitino fiivoco ihaciqui, nooboro.

¹⁵ Jaanegui diigo diiboco nuuhi: Aivojiibo, uco tofaihuti daaci uco adufira aivotino iicaqui, bu siino jihojjaago nifaihufiri saatigo icaqui, noogoro.

¹⁶ Jaanegui Jesu diigoco nuuhi: Difo jaagoro ditajeque coovato. Jaadi siino disaa, nooboro.

¹⁷ Jaanegui diiboco iimusuugo: Uujoho tajevatíhi, noogoro.

Jaanegui Jesu diigoco nuuhi: Miyaanoco neehi, tajevatíhi onoogo.

¹⁸ Miíro sahusedimoma diicacuui, jisumi bu diiboma idiicaabo ditaje icatiibo. Jaanoco miyaanoco neehi, nooboro.

¹⁹ Jaanoco uguubuugoro diiboco nuugo: Aivojiibo ijoho baacho Moocaani iimaaminaafi. ²⁰ Miíro moheedeete samaritanomi Moocaanico jigajihallivi imejiibuui. Jaarunaa amiíhai judiomi Jerusalevi Moocaani imomaño meneehicahi, noogoro.

²¹ Jaanegui Jesu nuuhi: Gaigo, uco miyaavogo, safucu icajino amiíhai Moocaanico mihimono. Tusumi jigajjaago footimo, bu Jerusale cuumijaago footimo icano. ²² Miíro amiíhai samaritanomi magajatiiboco mihimehi. Jaanoti miíhai magaajaaboco mihimefíhi; Miíro judiomi taajasu saahi. ²³ Jaanoti safucu icajino, jaano jino tusumi mihicacuui, miyanotiro Moocaanico iimomo imeji igajari, miyaaneri icano. Miíro tolli iimomoco Moocaani imeguehi. ²⁴ Moocaani Gaija jaamaño diiboco iimomo igajari, miyaaneri icano iimequi, nooboro.

²⁵ Jaanegui diigo nuuhi: Uuro gaajahi Mesia, Cristo onoobo, asaajinoco. Jaabo asaadi miíhaico paryi fanoocoro jibeguejiibo, noogoro.

²⁶ Jaanegui Jesu diigoco nuuhi: Uujoho diibo iima ihiimaabo, nooboro.

²⁷ Jaanaa ijiibogominaa gaseuhi. Jaamo jabafituuhi. Jesu gaigooma ihiimaaneri. Jaarumo diiboco dilluutihí. ¿Jinejeque dilluhi? ¿Jinejeque mihii maacasíhi? nuutimo. ²⁸ Jaanegui diigo ihicíñuco ejevesuhiniugoro fuuhi ifaacuumijaago. Jaagoro miyaminaaco jibugutuui.

²⁹ Eneecauhu masaamoro memeeceva saafi gafi, paryi omoonihicanoco uco onooboco. ¿Naa fine diibo Cristo icatiibo? noogoro.

³⁰ Jaanegui diito tuucuumiti asaamoró fuuhi diibojaago. ³¹ Jaanaaca ijiibogominaa diiboco neehicauhi: Mojiibogominaafi, machu, noomoro.

³² Jaarunaa diitoco nuubo: Tamachuta icahi uujoho amachujino amiíhaima magajatino, nooboro.

³³ Jaanegui ijiibogominaa dillucasiuhi sanomiro: ¿Fine miíjoho diibedi machutaaco sivahi? noomoro.

³⁴ Jaarunaa Jesu diitoco nuuhi: Uudi tamachutabadi oono uco agalluubo onoobadi eetavono, idudicamaajeque iimivono. ³⁵ Miíro amiíhai meneehi: Icanehiica minihíbací, minihíbací idíño basuta ujusijino, noomoro.

Jaarunofaño amiíhaico uujoho neehi: Memeece basutaaco, oono paryi tifaicuuhi ihicafetequi. ³⁶ Miíro basutaaco ududicamaaibo ijaadaco gaayicífihi. Jaabo basuta noovaco ananinicíbadí miyaminaaco nanihi ifinijitino fiivoma iicaqui. Jaaneri abasuubo, bu toonoco íciibo icano sano imo imo iicaqui. ³⁷ Jinoovi aivo miyaano, jilli onoonicino: Saafi abasunoco sifi icinicíhi, onoono. ³⁸ Jaanegui uujoho amiíhaico tajiibahi mihicíqui amiíhai mabasuhinitinoco; sita abasuhininoco amiíhai mequeheevéhi idudicamaajeque, nooboro.

³⁹ Jaaboco síhidi Samaria jiiñije cuumiminaa miyaavuguui diigo ijiibuguunoti paryi uujoho omoonihicano uco noobo unuunoti. ⁴⁰ Jaanegui samaritanomi diibojaa asaamoró diiboco fítiuhi diitoma iicaqui.

Jaanegui Jesu mifucuci toonovi diitoma icauhi. ⁴¹ Jaamoro diiboco sihidi miyaavuguumo ihiimaaco uguubuumoro. ⁴² Jaamoro diigoco nuumo: Jisumi iijoho eneeneriro mimiyaavogocutihi: Miihairyo muguubucuuhi. Jaamoro magaajacuuhi miyaanoro diibo Cristo jiinjeminaa taajasuminaafi icanoco, noomoro.

Jesu Buheesuhi Aivojiibo Seemeneque.

⁴³ Toonoti mifucuci iicaunoti fuubo Galilea jiinijejaagovi. ⁴⁴ Jaabo Jesu inoro nuuhi: Mooaani iimaaminaafi ijiinjevi bocigoratihi, nooboro.

⁴⁵ Jaadi Galileavi agaseuboco tomañoto imino gaayiciuhi. Diito tolliro bu fuumo Jerusalevi Pascua jiiibaimojaago. Jaamo atyimeuhi tahi tobaimovi Jesu fanoovaco omoonuunoco.

⁴⁶ Jaadi Jesu siino saauhi Cana cuumijaagovi Galilea jiinjevi toonovi nifaihuco aivofaihuti iminiyumañovi. Jaanaa Capernaui icaubo saafi aivojiibo. Jaabo seemene guihuvauhi. ⁴⁷ Jaabo guubuuhi Jesu Judeati Galileavi agaseunoco. Jaanegui diibojaa ufuuboro diiboco nuubo iijajaa ofooboro iseemeneque ibuheesuqui aivo iniinovacuuneguiiha. ⁴⁸ Jaanegui Jesu nuuhi: Boti siibadi iicanehejeque omooninoco mahatyimetihachijji mimiyaaveguejitih, nooboro.

⁴⁹ Jaarunofañ diibo Jesuco nuuhi: Aivojiibo goovano masiigo taseemene guijevetinaacaro, nooboro.

⁵⁰ Jaanegui Jesu nuuhi: Fuucu, diseemene buheecuhi, nooboro. Jaanegui diibo Jesu unuunoco imiyaavuguboro fuucuuhi. ⁵¹ Jaabo iijati fiiticuuboco idudicamaajeminaa asaamoro jiiibogovauhi: Diseemene buheecuhi, noomoro. ⁵² Jaanegui diitoco dilluubo: ¿Conooti nihiba iicaaberi buheehiniibo? nooboro. Jaanegui diiboco nuumo: Iiji dijiiveeberi iguihuva diiboco buuhinihi, noomoro. ⁵³ Jaanoti caani gaajauhi toonoti nihiba iicaaberi Jesu diiboco: Diseemene buheehi, eenehininoco. Jaanoma iicaubo paryi iyotoma Jesuco miyaavuguuhi.

⁵⁴ Jino Jesu sihidi ejeevanoco Galileavi iticoni omoonuunoco alliniuhi Judeati Galileavi siino uhuumiusumi.

Jesu Buheesuhi Iigotiiboco.

5 Toonobuunati judiomi eetavuuihi jiiibaimoco. Jaanegui Jesu fuuhi Jerusalevi. ² Jahigo Jerusalevi ovejami guhuga onoohuga fiitino icano jicooba nicutaaba hebreomi iijiri Betesda onooba. Jaabaati icano sahusedino iguhugano. ³ Jaahugaje goohasinovi sihidi iguihuvafiimo icahicauhi aatyimetimo, idiino iimitimo, ifiino isifañineri iigotimeheje icamo. Jaamo teemehicauhi toba nifaihu amaryibanosa. ⁴ Miiro tobajaago Mooaani toomominaafi niitehicauhi safohosa jaaboro inifaihuco maryicuvahicauhi. Jaasumiro tobafaño imegaviro aacotoobo buheehicauhi, jilli fanoova guihuva^c ⁵ Jaamañeri icaubo saafi treinta y ochodino ficabano ticovovi iguihuvacuubo. ⁶ Jaabo siuciniuboco Jesu aatyimeuboro gaajaciuhi aivo guenene iicacuunoco. Jaaboro diiboco nuubo: ¿Diimeguehi ubuheeneque? nooboro.

⁷ Jaanegui diibo iimusuuhi: Aivojiibo, miijoho bu uco tobafaño jiihacujirahi toba amaryibasumi fahijivaro tobafaño feequi mooninaacaro sita tahimegaro feehicahi, nooboro.

⁸ Jaanegui Jesu diiboco nuuhi: Gañiivo jaaboro dicigaiijeque diiciibo fuucu, nooboro.

⁹ Jaasumiro diibo buheeteuhi. Jaaboro icigaiijeque iiciuboro igucuubo. Jaafucuu judiomi jaguisifucuu. ¹⁰ Jaanegui judiomi Jesu ubuheesuuboco nuuhi: Jaachijji jino jaguisifucu. Jaanegui dicigaiijeque satyeyitih, noomoro.

¹¹ Jaanegui diibo iimusuuhi: Miïro uco ubuheesuubo diiboro uco neehi: Dicigaiijeque diiciibo fuucu, nooboro.

¹² Jaanegui dilluumo: ¿Miijoho diibo ico dicigaiijeque diiciibo diigo onoo? noomoro.

¹³ Jaarunofaño diibo gaajautih diiboco ubuheesuuboco. Tomañeri sihidí miyamínaa iicaumo cojití Jesu sihigovi ufucumaño. ¹⁴ Jaanobuunati Jesu diiboco siino templojafaño aatyimeuboro nuuhi: Meeci, jisumi jino ijoho ubuheecunoco; siino imitino diicacujirahana janaanici iicano siino dijaa saadino, nooboro.

¹⁵ Jaanegui diibo ufuuboro judiomico jiibugutuubo Jesujaahi diiboco ubuheesuunoco. ¹⁶ Jaanoma iicaumo judiomi Jesuco imitino moonihicauhi, diibo jaguisifucuvi tolli omoonihicaumaño. ¹⁷ Jaanegui Jesu nuuhi: Guihirubi, jisumihachuta dudicamaahi. Jaano ticovovi bu uujoho dudicamaahi, nooboro.

¹⁸ Jaanoma iicamo judiomi janaanici imeguehicauhi diiboco agaicaunoco. Miïro toono jaguisifucucoro diitobadi teemehicautiibo, tolliro bu Moocaanico: Guihirubi, onoooro ifiico Moocaanibadi moonihicaubo icano.

Moocaani Achi Mitya Iiji.

¹⁹ Jaanegui diitoco nuubo: Miyanotiro, miyanotiro amihaico neehi: Uujoho Moocaani Seemene iinoro ijeebiitiro moonitih. Miïro Caani omooninoco aatyimeebere, bu tolliro Illi moonih. ²⁰ Miïro Moocaani Illico agaijimaño fanoova mooninoco diiboco ifusuhi. Miïro imi janaanici ejeevanoco iifusujiiBehiica. Jaaneri amiihai majabafiteji. ²¹ Moocaani uchuumucuumoco ubuheetesuuboro fiivoco aacibadiro bu Illi iimogomoco fiivoco aciji. ²² Miïro Moocaani mihihiñoobaco iimitico nootih. Jaaruubo paryi toono imibachu mityaco Illi usefaño jeevesuubo, imitico iimibachuqui; ²³ Toonoti famooro Illico ibocigequi Caanico icabadiro. Jaanoti Illico obocigotimo, tolliro bu Caanico bocigotih diiboco agalluuboco.

²⁴ Miyanotiro, miyanotiro amihaico neehi: Uco agalluhiniiboco imiyaavogomoro uujoho onoonoco uguubumo ifinijitino fiivoma icacuhi. Jaamo cijigaifaño fuucuujitih; Jilliro guijevefi fiivofaño vi fatyucuubo.

²⁵ Miyanotiro, miyanotiro neehi: Ufucu icajino, jaano jino tusumi mihicacuhi; iimitifaño miguijevecubadihiica iicamo Moocaani Achi iijico uguubujino. Jaanoco uguubumo fiivoma icaji. ²⁶ Moocaanima mitya icahi fiivoco aacijino. Jaabo Illico mityaco aciibo tolliro Illi sitaaco fiivoco ihaciqui. ²⁷ Tolliro bu mitya iijico aciibo miyaminaafañoti iimitino, iimino icanoco idugaacufu, uujoho Miyaminaafibadi Ifiivuuho iicamaño. ²⁸ Jinoti meheetyedino: Ufucu icajinehiica tusumi paryicino ciihojinofaño iicamo ihiimaaco uguubujino. ²⁹ Jaamo iiminoco omooniumo siino buheeteji fiivoma iicaqui. Jaanoti iimitinoco omooniumo buheeteji cijigaifaño ifeequi.

Cristoti Ijibogono.

³⁰ Miuro ujoho aivo, uuro tajebebitiro moonijitirahi. Jaamaño ujoho iimitinoco dugaacuhi uco atajibabadi. Jaano ujoho udugaacuno miyaano tajebebiti uuro iimogonoco omoonitimaño. Jilli Guihirubi uco agalluhiniibo iimogonocoro moonihi. ³¹ Ujoho uuro tafitiro jibuguruva tajiibogo saatehedi ibocima chahajirahi. ³² Jaanoti sifi uuditi jibeguehi. Jaamaño ujoho gaajahi uuditi diibo onono miyaano iicanoco. ³³ Miuro amiihai saathococo magalluui Juajaago diiboco idillutequi. Jaanoco diibo miyaanoco nuuhi. ³⁴ Jaarunofaño ujoho gaayicitihi miyaminaafi ijibogonoco. Jaarunoco ujoho jilli Juati amiihaico neehi. Jaamo uco mimiyaavogomoro mataajaji. ³⁵ Miuro Jua ciijigaimecu ijiganoro aachicibadi jeevauhi. Jaabo aachiciniunofaño amiihai jihachutagayiro imo imo mihicauhi. ³⁶ Jaaruno toono Jua ijibuguuno janaaniciwi ujoho onono jeevauhi. Miuro Moocaani uco agalluubo atajiibaunoco omoonino. Toonoro tahallivi jibeguehi miyaano uco Moocaani agallunoco. ³⁷ Tolliro bu Guihirubi uco agalluubo uuti jibeguehi. Jaaruuboco amiihai safooba mahatyimetatihi, bu ihiimaaco safooba muguubutatihi icano. ³⁸ Tolliro bu diibo iiji amiihaifaño chahahi; Diibo agalluhiniiboco amiihai mimiyaavogotimaño. ³⁹ Miuro Caatinihaameque imino amiihai mihifinichicahi fiivo ifiico toohaamefaño mahatyimeneque mihimogomoro. Jaano miuro toohaame uuditi ijibuguruhaame. ⁴⁰ Jaarumo tajaa masaanoco mihimogotihivi fiivoma mihicajiruneguiiha. ⁴¹ Ujoho miyaminaa cahacisuco gaayicitihi. ⁴² Jaabadiro ujoho gaajahi amiihai Moocaanico magajitinoco. ⁴³ Miuro ujoho Guihirubi memeri saahinihi; Jaaruuboco uco magaayicitihi. Jaanoti sifi jilli ijeebitiro asaaboco naha amiihai magaayicijirahi. ⁴⁴ ¿Milli jaamo mimiyaaveguejirahi sanomiro fahigovavi miyaminaa imihicacoro magaayicicasimo? Jaamaño toonoguinodi idiiboro iicaabo Moocaaniti asaano imihicaco miguiinotihi. ⁴⁵ Jaanegui uuditi mehesamaaidino: Caani imefeenevi mihaico imitino neejiiibo, noomoro. Icaabo amiihai imitico eneejiiibo Moise. Jaabo tajiibafeenedi mataajibadi mehesicinjirahi. ⁴⁶ Miuro Moiseque mimiyaavuguruva uco tolliro mimiyaaveguejirahi. Miuro diibo uuti caatiniuhi. ⁴⁷ Jaabo acaatiniunoco mimiyaavogotimo, ¿milli bu taajico mimiyaaveguejirahi?

Cinco Mildimoco Amachusuno.

(Mt 12.13-21; Mr 6.30-44; Lc 9.10-17)

6 Toonobuunati Jesu fuuhi Galilea muuai onegueehivi. Jaaba momoro bu Tiberia onoomuui. ² Jaabo dojicuti sihidi miyaminaa feehicauhi sihidi ejeevanoco omooniiiboro iguihuvamoco ubuheesunoco aatyimehicauneguiiha. ³ Jaanegui Jesu ifabaihallivi ufuuboro ijibogominaama casiiuuubo. ⁴ Jaasumi fiiticuuno judiomi jibaimo Pascua iicaujino. ⁵ Jaanaa Jesu emeeçubo atyimeuhi sihidi miyaminaa idojicuti asaunoco. Jaanegui Felipeque nuubo: ¿Cuucati fine machutaaco manaajejirahi jito imachuqui? nooboro.

⁶ Jilli Felipeque nuubo jilli diiboco inisuubo, ¿milli fine neejiiibo? onoomaño jilli omoonijinoco imino agaajacuuboro. ⁷ Jaanegui Felipe nuuhi: Fine doscientos denario ticovovi manaajejirahi, machutaaco. Jaaruno famooviro ajashuno iifetejitirahi, nooboro.

⁸ Jaanegui ijiibogominaati saafi Andre Simon Pedro nahabo Jesuco nuuhi: ⁹ Jineeri icase sase sahusedino sebada maahuno, bu miimisiici tavaabomisi icanoma icase. ¿Milli jaano tonoodino jinoodimo miyaminaavi ifetejirahi? nooboro.

¹⁰ Jaanegui Jesu nuuhi: Diitoco monoo icasiicamaaiqui, nooboro. Jaamañeri sihidi ñaavahu icauhi. Jaanohallivi casiicamaaiumo cinco mildino gaiffimi. ¹¹ Jaadi Jesu imaahunoco iiciuboro Moocaanico graciaco aaciuboro, toonoco ijiibogominaaco aciubo. Jaanoco diito imiyaminaama ifuuhi giciniuumoma. Tolliro bu itaavaco iifuumo iimuguudineheje.

¹² Jaanoco amachuumo utuvacuudi Jesu nuuhi, ijiibogominaaco: Paryi manaani ihatyuuvoco gaññicafototino iicaqui, nooboro.

¹³ Jaanoco ananiumo gahafusuuhi, jiiibañoco fahuseeci, siino miibaici icanoco sahusedino sebada maahuno iicaunoti aatyuvuunoco. ¹⁴ Jaano Jesu sihidi ejeevano iifusuo eheetavuunoco aatyimeumoro diito nuuhi: Miyaanoro jahi jaani Moocaani iimaaminaafi jiiinjehallivi asaaujiibo, noomoro.

¹⁵ Jaamoro Jesuco iiciumoro satyuujirumo aivojiiiboti iheetavequi. Jaanoco agaajaciuboro iinoro fuubo siino ifabaijaagovi.

Jesu Nifaiuhallidi Iguehi.

(Mt 12.22-27; Mr 6.45-52)

¹⁶ Jaanaa mihiijuuudi ijiibogominaa muuaijaago fuuhi. ¹⁷ Jaamoro meenegafaño ijicamaaiumoro fuumo onegueehi Capernaujaagovi. Jaanaa civucuuno. Jaarunaa Jesu diitojaa gaseutihi. ¹⁸ Jaanaa imuuaiifa ticovauno sihidi guibuhuba asaano. ¹⁹ Jaamo ufuumo sahuse juugahuseti sano idiino kilometronohachuta icacuumaa Jesu saauhi nifaiuhallidi igooboro. Jaaboco aatyimeumoro sihidi igutuumo. ²⁰ Jaarunaa diitoco nuubo: Uujoho; mihiguetejirahana, nooboro.

²¹ Jaanegui diito diiboco imo imo imeenegafaño gaayiciuhi. Jaadi goovano iifutuumo ufuuhigo.

Miyaminaa Jesuco Guinehi.

²² Jaano sesevedi toonegueehivi miyaminaa ifitafutuumo gaajauhi sagaaro meenega iicaunoco. Jaagafaño Jesu ijiibogominaama footinaaca diito iinoro fuumo. ²³ Jaanaa bu sagahaje gaseuhi Tiberia cuumiti asaano, jaagahaje cañavuuhi Jesu graciaco aaciunobuunati maahunoco amachuuno fiitino. ²⁴ Jaamañovi Jesu, ijiibogominaa icano achahaunoco miyaminaa aatyimeumoro toono imeenenefaño ijicamaaiumoro fuumo Capernaujaago Jesuco guinomoro.

Jesu Fiivoco Aacineguiiha Diiboco Fiivo Maahuti Momonimo.

²⁵ Jaaboco onogoo muuavi aatyimeumoro nuumo: Jiibogominaafi, ¿cusumi gashinihi? noomoro.

²⁶ Jaanegui Jesu diitoco iimusuuhi: Miyanotiro, miyanotiro amihaico neehi: Jilli mamachuhinimo mutuvahinineguiiha uco miguiinehi. Jilli sihidi ejeevanoco eheetavehininoco mimiyaaveneguiiha icatino. ²⁷ Jaanegui ifinino machutaguiiha mududicamaaidino, ifinijitino fiivoco acino machutaguiiharo mududicamaaje. Toonoco uujoho Miyaminaaafibadi Ifiivuubo amihaico aacijino. Toonoti uujoho Moocaaniti asaanoco miyaminaa igaajaqi, bu uuvi Moocaani igaajataco ificucuuno icano, nooboro.

²⁸ Jaanegui diiboco dilluumo: ¿Milli jaanegui momooniji Moocaani iijico meheetavequi? noomoro.

²⁹ Jaanegui Jesu diitoco nuuhi: Moocaani imeguehi, diibo uco agalluuboco amiihai mimiyaavogonoco, nooboro.

³⁰ Jaanegui diiboco nuumo: ¿Eneecata sihidi ejeevanoco miihaico dihiufusu maatyimemere ico mimiyaaveguequi? ³¹ Miiro moheedeetemihai machuui mana onoonoco sicaihigovi iicausumi, oono Caatinihaamefaño: Niquejeje maahunoco machusuubo, onobadi, noomoro.

³² Jaanegui Jesu iimusuuhi: Miyanotiro, miyanotiro amiihaico neehi: Moise amiihaico niqueje maahuco acitihi, Guihirubi amiihaico jino miya maahu niqueje maahuco acihi. ³³ Jaano jino Moocaani maahu diibo niquejefañoti iniitooobojiinijeminaaco fiivoco aaciibo, nooboro.

³⁴ Jaanegui nuumo: Aivojiibo, fahijivaro miihaico toono maahuco daacihica, noomoro.

³⁵ Jaanegui Jesu nuuhi: Uujoho fiivo maahu; tajaa asaamo ajebavacuujitihi, uco imiyaavogomoco ufucuro adufira aivucuujitihi icano.

³⁶ Miiro amiihaico uujoho eneehinicuubadi: Uco mahatyimecuuru uco mimiyaaveguehacatihi. ³⁷ Miiro paryi fanooro Guihirubi uco aacino tajaa saaji, tolliro bu tajaa asaamoco uujoho buhi gañijitihi. ³⁸ Uujoho niquejefañoti niitehinitihi uuro iimogonoco mooniqui icatino, jilli uco agalluuhiniibo iimogobadi mooniqui saahinihi. ³⁹ Jaano jino Guihirubi uco agalluuhiniibo iimogono; Paryi diibo uco aacimoco saatohobaco jeevesutiibo paryi famoocoro ufucu niinofucusumi buheetesuji. ⁴⁰ Jaano jino uco agalluuhiniibo iimogono; Paryi famooro miyaminaa Moocaani Seemeneque aatyimemere imiyaavogomo ifinijitino fiivoma iicaqui. Jaamoco uujoho niinofucusumi buheetesuji, nooboro.

⁴¹ Jaanegui judiomi ticovauhi diiboco edejecumoco. Uujoho fiivo maahu niquejefañoti iniitoooboji, unuuneguiiha ⁴² neehicauhi: ¿Nacu jaani Jesu Jose achi icatiibo? ¿Miiro caani, seeji icamoco miihai magajahi? ¿Milli jaabo: Uujoho niquejefañoti niitehi, neehicahi? noomoro.

⁴³ Jaanegui Jesu nuuhi: Musuufeni toono amiihai dejecufiraco.

⁴⁴ Miihaiñooba tajaa saajitirahi Guihirubi uco agalluhiniibo tajaa isivatiruva. Jaamoco uujoho buheetesuji ufucu niinofucu. ⁴⁵ Miiro, Moocaani iimaaminaa aamefaño jilli noono: Moocaani famoocoro jiiibegueji, noonoro. Jaabadi famooro Moocaanico uguubuunoro diiboti agaajamo tajaa saahi.

⁴⁶ Miihaiñooba Moocaanico atyimetihidi iiboro uujoho Moocaaniti asaambo Moocaanico atyimehi. ⁴⁷ Miyanotiro, miyanotiro amiihaico neehi: Uco imiyaavogomo ifinijitino fiivoma icaji. ⁴⁸ Uujoho fiivo maahu. ⁴⁹ Miiro amiihai eedeete manaaco sicaihigovi amachuuruco chuumuui. ⁵⁰ Jaanoti naha jino niquejefañoti iniitono maahu. Jaanoti amachumo gujivetimo iicaqui. ⁵¹ Uujoho diiburucu jino fiivo maahu iicaabo niquejefañoti iniitehiniibo. Jaamo uco agaayicimo ifinijitino fiivoma icaji. Jaano maahuco uujoho aacino taahuco. Jaanoco uujoho jiinijeminaahallivi aacijino, nooboro.

⁵² Jaanegui judiomi ticovauhi sanomiro iimaacasiumo: ¿Milli jaabo jaani miihaico duusujirahi ihuucuco? noomoro.

⁵³ Jaanegui Jesu nuuhi: Miyanotiro, miyanotiro amiihaico neehi: Uujoho Miyaminaafibadi Ifiivoooboji uucuco muduutihachijiji, bu itijohoco mahadutihachijiji icano fiivoma mihicajitihi. ⁵⁴ Jaanoti taahuco

amachuubo, tatyijohoco aaduubo icano ifinijitino fiivoma icaji. Jaaboco uujoho niinofucu buheetesuji. ⁵⁵Jaano tafi miya machuta, tatyijoho miya adufaihu icano. ⁵⁶Jaamo tafico amachumo, tatyijohoco aadumo icano uuma icahi. Jaamoma bu uujoho tolliro icahi. ⁵⁷Miuro Moocaani uco agalluubo ifiima icahi, jaaberi uujoho icahi icano. Jaabadiro uco amachuubo uuri icaji. ⁵⁸Jino niquejeti iniiuuno maahu; amiihai caanimihai manaaco amachuumo iguijeveubadi iicano icatino. Jaanoti jihicati amachumo ifinijitino fiivoma icaji, nooboro.

⁵⁹Jilli nuubo Jesu Capernau cuumi sinagogajafaño ijiiuguubo.

Jesu Iimaa Fiivoco Acihi.

⁶⁰Jaanoco sihidi saatoho ijiihogominaa uguubuumoro nuuhi: Aivo jihiiama sihidi jeevahi. ¿Miijoho fine gaayicijirahi? noomoro.

⁶¹Jaanoco Jesu ijiihogominaa onocasiunoco agaajaciuboro nuubo: ¿Jaano nacu amiihaico imitino moonihi? ⁶²¿Millijiru fine imi, uujoho Miyaminaafibadi Ifiivuuboco caamo iticoni icauhigo ofooboco mahatyi meruva? ⁶³Miuro Moocaani Gaija miinoco fiivoco acihi. Jaanoti muuhucu jilli jihovono. Jaanoti naha jino uujoho ihiimaano amiihai jeebiico ifinijitino fiivoco aacijino.

⁶⁴Jaarunofaño icamo amiihaiti saatoho imiyaavogotimo, nooboro. Miuro Jesu imegaviro gaajacuhi imiyaaveguejitimoco, bu diiboco igaicaaqui aaciujiiboco icano. ⁶⁵Jaamaño nuubo: Toonegui amiihaico neehinihi: Miihaiñooba tajaa saajitirahi Guihirubi tajaa isivatiruva, nooboro.

⁶⁶Jaasumitiro sihidi saatoho diibo dojicuti efeehicaumo diibediti udugaavuumoro diiboma fuucutimo. ⁶⁷Jaanegui Jesu saatoho ijiihogominaa fahuseeci motihaiti miimisiici icano iicaumoco nuubo: ¿Nacu bu amiihai tolliro diitobadiro mefejeji? nooboro.

⁶⁸Jaanegui Simon Pedro diiboco iimusuuhi: ¿Aivojiibo, miijaago bu miihai mefejejrachi? Miuro iima icano ifinijitino fiivo iimaa. ⁶⁹Miuro miihai mimiyaaveguehnicuui. Jaamoro magajahi ijoho Cristo Moocaani iicaabo Seemene idiicanoco, nooboro.

⁷⁰Jaanegui Jesu diitoco nuuhi: Amiihai docedimoco uujoho icihinihi. Jaamo amiihaifañoti iicaabo saafi iji iicaabo, nooboro.

⁷¹Jilli nuubo Juda Iscariote Simon achiditi. Jaabo Juda docedimoobo iicaabo Jesucristoco iguijeniqui aaciujiibo.

Jesuco Inahabomi Miyaaveguehicautihi.

7 Jaanobuunati Jesu Galilea jiiijeri igooboro feehicauhi. Jaaboro Judea jiiijevi ofoonoco imeguehicautiibo judiomi diiboco tahi agaicaauguuneguiiha. ²Jaanaa fiiticuuno tabernaculojano jiiibaimo iicaujino; tusumi judiomi nijeganofaño icanicimico. ³Jaaneguiiha Jesuco inahabomi nuuhi: Jinooti difo Judeavi. Tahi iicamo didojicuti ofoonicimico edeetavonoco ihatyi mequi. ⁴Miuro miihaiñooba miyaminaaco ifiico igaajasuqui omoonimo toovono moonitatihhi, tolli bu omooniiibo famoo imefeeneviro moonihica, noomoro.

⁵Jilli nuumo inahabomi icarumo diiboco imiyaaveguehicautiimaño.

⁶Jaanegui Jesu diitoco nuuhi: Tufucuvihiica uujoho iifototihiica. Jaanoti amiihaidi naha fafucuvaro imihi. ⁷Miuro amiihaico jiiijeminaa jiiheguetihhi. Jaanoti uco jiihegueme diito imitico onoonohalliti.

⁸Amiihairyo tobaimojaago mofoo. Jaanoti uujoho tobaimovi footihica

tahoovofucuvihica uujoho ifototíhi, nooboro. ⁹Diitoco tolli unuuboro fitafutuubo Galileavi.

Jesu Fuuhi Nijegano Jiibaimovi.

¹⁰Jaadi inahabomi tobaimojaa ufuunobuunati, Jesu tolliro bu fuuhi. Jaaruubo foovono fuutiibo, toovonoro fuubo saatohoba diiboco aatyimeujiruneguiha. ¹¹Jaaboco judiomi tobaimoguiino iguiniomoro neehicaui: ¿Cuuca fine iicaabo? noomoro.

¹²Jaabediti sihidi miyaminaa miribacasihicaui. Saatohe neehicaui: Aivo imihuseebe, noomoro. Jaanoti saatohe neehicaui: Imitiibo miyaminaaco bañihicaabo, noomoro.

¹³Jaarumo miihaiñooba foovono diibediti iimaahicautihi judiomi ñihicuti.

¹⁴Jaanaa ijiibaimo feeneveunaaca Jesu templojafaño jicafutuuihi. Jaaboro ticovaubo ijiibuguubo. ¹⁵Jaaneri judiomi sihidi eheetyemere neehicaui: ¿Milli jaabo sihidi fanoovaco gaajahi aamenaño icautiruubo? noomoro.

¹⁶Jaanegui Jesu diitoco iimusuihi: Uujoho tajeebiitiro jiibogotihi uco agalluuhiniibo jiibogoco uujoho jiibeguehi. ¹⁷Cajaatyohacho Moocaani iimogonocoro omoonigomo, gaajaji Moocaani jiibogoco ijiibogonoco nacu tajeebiitiro uujoho onoono iicanoco. ¹⁸Jaanoti ijeebiitiro ihiimaabo diiboco miyaminaa obocigonoco imeguefíhi. Jaanoti diiboco agalluhiniiboco obocigoobo, miyaanoco iimaahi. Jaabofaño bañifira chahahi.

¹⁹Miíro amiíhaico Moise tajiibaco aciuihi. Jaarunoco amiíhaiti saatohoba imino moonitíhi. ¿Collíhi jaamo uco magacaaujirahi? nooboro.

²⁰Jaanegui miyaminaa iimusuihi: Híjoho íjima diicahi. ¿Miíjoho nacu ico gaicaaujirahi? noomoro.

²¹Jaanegui Jesu diitoco nuuhi: Sanoocoro jaguisifucusumi omoonihineri famoro meheetyehinihi. ²²Miíro Moise amiíhaico tajiibauhi amiíhai meehe nigaci quiticico. Jaarunoco diibo ticoniutihi omoonuubo, amiíhai eedeetemíhai toonoco ticoniuihi eheetavuumo. Jaanoco amiíhai jaguisifucusumi meheetavonicihi. ²³Jaano Moise tajiiba gañicafototino iicaqui momoonimoro jaguisifucusumi gaifi seemene meeheque miquticinihi. ¿Jaamo collíhi taja misifíratehi jaguisifucusumi saafi miyaminaafico faabohocoro ubuheesuhininohalliti? ²⁴Imino meecitimoro saatohoditi mihiimaadino. Jari imino magaajaadi mihiima, nooboro.

¿Naa Fine Jaani Cristo?

²⁵Jaanaa saatohe Jerusaleri iicahicaumo nuuhi: ¿Nacu jaanico iguijeniqui iguinehicaabo icatiibo? ²⁶Memeeci ono famoofeeneviro iimaaruuboco miihaiñooba milli moonitíhi: ¿Naa fine jísumi aivojito gaajacuuhi diibo Cristo iicanoco? ²⁷Jaanoti miihai magaajahi tahigoti diibo asaahigoco. Jaanoti Cristo asaadi miihaiñooba gaajajitíhi cuucati diibo asaanoco, noomoro.

²⁸Jaanegui Jesu templojafaño ijiibuguumañoti sefano nuubo: Uco naha amiíhai magaajahi tahigoti asaahigoco. Jaaruubo uujoho tajeebiitiro saatíhi. Jaabo uco agalluuhiniibo miyaabo iicaaboco amiíhai magaajatihi. ²⁹Jaanoti uujoho diiboco gaajahi diiboti asaahinimaño. Miíro diibo uco galluuhinihi, nooboro.

³⁰Jaanegui diito diiboco gaayiciujirahi diiboco icivojaaniqui. Jaarunofaño miihaiñooba diiboco gaayiciutihi ihoovofucuví ífutuutimaño.

³¹ Jaarunofaño sihidi diitoti saatoho diiboco miyaavuguuhi. Jaamoro nuuhi: ¿Nacu Cristo asaadi jaani sihidi ejeevanoco eheetavehicano janaanici eetavejiruubo fine? noomoro.

Fariseomi Sisiminaaco Galluui Jesuco Igaayiciqui.

³² Jaanoco fariseomi guubuui miyaminaa toonoti imiribacasiunoco. Jaaneguiha sacerdotemi aivojito, fariseomi icamo sisiminaaco galluui Jesuco igayiciqui. ³³ Jaanegui Jesu diitoco nuuhi: Gueenenehiica amiihaima icaji. Jaadi dojicuviro feeji uco agalluubojaago. ³⁴ Jaaboco miguiinejirahi. Jaarumo uco mahatyimejitihii uujoho iicahigo amiihai mihifetejitimaño uco mahatyimejitihii.

³⁵ Jaanegui judiomi sanomiro noocasiuhi: ¿Cuuca fine jaabo ofooboco mahatyimejitihii? ¿Nacu fine griegomifeenevi judiomi agavaracinimojaago feejiibo griegomico ijiebeguequi? ³⁶ ¿Milli fine eneejirunoco oono miihaico noobo: Uco miguiinejirahi. Jaarumo uco mahatyimejitihii uujoho iicahigo mihifetejitimaño, noobo? noomoro.

Moocaani Gaija Fiivo Muuai Nifaihubadi Icaabo.

³⁷ Jaanaa niinofucu imiya jiiibaimofucu Jesu agaaniiuuboro sefano nuuhi: Saatoho adufirari mihichahachijii tajaa masaamoro, mahaduva. ³⁸ Uco imiyaavogoobo, Caatinihaamefaño onoobadi: Dijeebiifañoti fiivo muuai nifaihu cuuji, nooboro.

³⁹ Jilli Jesu nuuhi: Diiboco imiyaavogomo Igaijaco agaayicijinoco. Tusumihiica Moocaani Gaija niituutihii Jesu niquejefaño ufuutimañehiica.

Miyaminaa Dugaavocasiuhi.

⁴⁰ Jilli Jesu unuunoco diitofeeneti saatoho uguubuunoro nuuhi: Miyaanoro jahi jaani Moocaani iimaaminaafi asaajiibo, noomoro.

⁴¹ Jaanoti saatoho neehicauhi: Jaani Cristo, noomoro. Jaanoti saatoho neehicauhi: ¿Nacu Galileati Cristo saajirahi? ⁴² Miuro Caatinihaamefaño noono: Cristo saaji, Aivojiibo David yotofañoti tolliro Belen allio cuumijefañoti David iicauhigoti saajiibo, noono, noomoro.

⁴³ Jaamoro miyaminaa fahigova dugaavocasiuhi Jesuhalliti. ⁴⁴ Jaanegui diitoti saatoho diiboco igayiciqui mooniurahi. Jaarumo saatohoba milli diiboco mooniutihii.

Aivojito Jesuco Miyaavogotihii.

⁴⁵ Jaanaa isisiminaa tahigoti siino saauhi. Jaamoco sacerdotemi aivojito fariseomi icamo nuuhi: ¿Collihii jana jaaboco misivatihii? noomoro.

⁴⁶ Jaanegui isisiminaa iimusuuhi: ¡Aivo chahamo saatohoba diibobadi ihiiamaamo! noomoro.

⁴⁷ Jaanegui fariseomi diitoco nuuhi: ¿Tolliro bu nacu amiihai diibo abañinoco mimiyaaveguehi? ⁴⁸ ¿Nacu amiihaidi saatoho aivojitoti, fariseomiti icano miyaaveguehi? Imiyaavogotimo duhu. ⁴⁹ Jaanoti jito miyaminaa tajiibaco agaajatimo jilli ciijigaifaño efeejimo, noomoro.

⁵⁰ Jaanegui diitoobo saafi Nicodemo onooobo safoono Jesuco fucu emecijeubo, nuuhi: ⁵¹ ¿Nacu miihai tajiiba saafi miyaminaafico: Iimiti, neejirahi, iticoni diibo omooninoco gaajacitimoro? nooboro.

⁵² Jaanegui diiboco nuumo: ¿Nacu bu ijoho Galileaooobo? Eneecau, imino Caatinihaameque dihiifinici Galileati Moocaani iimaaminaa saatatihii, noomoro ⁵³ ijeevadi sahaje iijanojaa fociniumo.

Gaifimima Icaffigo.

8 Jaanoti Jesu fuuhi Olivohono iicagajjaago. ² Jaano sesevedi fucuro Jesu siino templojafaño saauhi. Jaabojaago sihidi miyaminaa saauhi. Jaamoco acasiivuuboro ticovaubo ijiiibuguubo. ³ Jaanaa fariseomi, caatiniminaa icamo diibojaa sivauhi gaigooco gaifimima iicafihicaugoco. Jaagoco diitofeneveni ificumoro ⁴ nuumo: Aivojiibo Jesu, jaamo aiji icanaaca, sifiima faguifaño icagoco mahatyimehi. ⁵ Miïro Moise itajiiibafaño jilli miïhaico neehi: Tolli iicagoco guisiri mahaamimoro magaicaau, nooboro. ¿Jana ijoho milli neehi? noomoro.

⁶ Jilli nuumo diiboco inisuumo, iifurumo toonohalliti diiboco icivojaaniqui. Jaanegui Jesu jiiinijehallivi idijiiivuuboro ticovaubo ihusegairi jiiinijeque acaatiniubo. ⁷ Jaaruna suufenitimo diiboco idilluhicaunegui, agaïivuuboro diitoco nuuhi: Eneecata amiihaiti saatoho imitima machahamo miticoni diigoco guisibari mahaamimo, ⁸ nooboro siino idijiiivuuboro jiiinijeque caatinihicaui. ⁹ Jilli unuunoco uguubuumoro tolliro diito iimitima iicaunoco ijeebiifañodi agaajaumoro ihamiyatoti ticovaumo safiisari ofociniumo. Jaanaa Jesu diigo icanoro covovacafutuuhi tomañovi. ¹⁰ Jaadi Jesu agaïivuudi miïhaiñoobaco atyimecuutiibo, idiigoro diigo toonovi ifitafutuugoco aatyimeuboro nuubo: Gaigo, ¿cuuca icamo dihallivi imitino ihiimaahicamo? ¿Miïro saatohoba ico milli moonitihi? nooboro.

¹¹ Jaanegui nuugo: Aivojiibo, saatohoba milli uco moonitihi, noogoro.

Jaanegui Jesu diigoco nuuhi: Uujoho bu icaruubo milli ico moonitihi. Fuucu. Jaagoro siino imitino diiacuujirahana, nooboro.

Jesu Miyaminaa Jeebiinoco Achiciniibo.

¹² Jaadi siino Jesu ihiimauboro miyaminaaco nuubo: Uujoho jiiinjeminaa jeebiico achiciniibo, tadyojicuti asaabo civohi icajitihî. Jaano ifinijitino fiivoco aacino foovoma icajiibo.

¹³ Jaanegui fariseomi diiboco nuuhi: Hjojho difitiro diibeguehichahi. Jaano dijiibogo ibocima chahahi, noomoro.

¹⁴ Jaanegui Jesu diitoco iimusuuhi: Jaaruno uujoho tahalliviro ijiiibuguruno tajiibogo ibocima icahi, uujoho asaahinihigoco, ofoohigoco icano agaajamaño. Jaanoti amiihai magaajatihî uujoho tahigoti asaahinihigoco, ofoohigoco icano. ¹⁵ Jaamo amiihai miyaminaa imitico meneehi jiiinjeminaa tajiibafeenedi. Jaanoti uujoho miïhaiñoobaco dugaacutihî. ¹⁶ Jaanoti dugaacuruva, uujoho udugaacuno miyaanejiru, saafiïro uujoho icatihî, Guihirubi uco agalluuhiniiboma mihicamaño. ¹⁷ Miïro amiihai tajiiba aamefaño noocinino: Miimisiici ijiiibogono ibocima icahi, noonoro. ¹⁸ Miïro uujoho tafitiro jiiibeguehi, tolliro bu Guihirubi uco agalluuhiniibo uutî jiiibeguehi icano, nooboro.

¹⁹ Jaanegui diiboco nuumo: ¿Cuuca nacu diicaani icahicahi? noomoro.

Jaanegui Jesu diitoco nuuhi: Uco amiihai magaajatihî, bu tolliro Guihirubico magaajatihî icano. Jaanoti uco magaajaruva tolliro Guihirubico magaajajirahi, nooboro.

²⁰ Jilli Jesu nuuhi templojafaño ijiiibuguubo nihibamico ijicuhicauno cojivi. Jaaruuboco miïhaiñooba gaayiciutihî, ihoovovi iifutuutimaño.

²¹ Uujoho feeji. Jaaboco miguiinurumo uco aatyimetimoro amiihai imitimaryo miguijeveji. Uujoho ofoohigo amiihai mefejeutihî, nuubo.

²² Jaanegui judiomi nuuhi: ¿Nacu fine iinoro ifiico guijenijiibo. Jaamaño: Uujoho ofoohi mefejetitih, noobo, noomoro.

²³ Jaanegui Jesu nuuhi: Amiihai baaoto. Jaanoti uujoho caamboobo. Amiihai jijjeminaa. Jaanoti uujoho jijjeminaafi icatitih. ²⁴ Jaamaño amiihaico: Amiihai imitimaryo miguijeveji, neehi. Miïro uco mimiyaavogotihachijji amiihai imitimaryo miguijeveji, nooboro.

²⁵ Jaanegui dilluumo: ¿Miijoho nacu ijoho? noomoro.

Jaanegui Jesu diitoco nuuhi: Siicijetiro amiihaico neehicacuui. ²⁶ Sihidi icano amiihaico eneejino, amiihaiti udugaacujino icano. Jaarunofaño uco agalluubo miyaanocoro neefihi. Jaabo uujoho diiboti uguubuunoco jiiijeminaaco jiiibeguehicahi, nooboro.

²⁷ Jaarunoco diito gaajahicautih Moocaaniditi ihiimaahicaunoco.

²⁸ Jaadi nuubo: Jari caamovi Miyaminaafbadi Ifivuuboco guijeve imohobujehallivi magañiicyididi magaaajaji, uujoho diiboro iicanoco. Tolliro bu tajeebiitiro uujoho omoonihicatinoco magaaajaji, bu tolliro Guihirubi uco jiiibeguehicanocoro omoonihicanoco icano. ²⁹ Uco agalluhiniibo uuma icahi. Jaabo Guihirubi uco jeevesutih, diibo iimogonocoro omoonihicamaño, nooboro.

³⁰ Jilli Jesu unuunoti saatoho sihidi diiboco miyaavuguuihi.

Moocaani Seeme, Bu Imitino Jijovoto Icamohallivi Jesu Iimaano.

³¹ Jaanegui judiomi diiboco imiyaavuguudimoco Jesu nuuhi: Taajico jeevesutimo mihicahachijji miyaano tajiibogominaa mihicaji. ³² Jaachijji magaaajaji miyaanoco. Jaano miyaano amiihaico imitifañoti sinaayuji, nooboro.

³³ Jaanegui diito nuuhi: Miihai Abraham iyaachimihai mihicamo sita jijovoto mihicatatitih. ¿Milliti jaabo miihaico ijoho misinaayucafeteji neehi? noomoro.

³⁴ Jaanegui Jesu diitoco nuuhi: Miyanotiro, miyanotiro amiihaico neehi: Paryi famooro imitico omoonimo, imiti jijovoto. ³⁵ Jaamaño jijovoboti icaabo ihaivojiibo seemefañodi icatitih. Jaanoti iseemene diitofañodi icanicahi. ³⁶ Jaamaño uujoho Moocaani Seemene amiihaico isinaayuhachijji miyanotiro jijovoto mihicacuujitih. ³⁷ Uujoho gaajarahi amiihai Abraham iyaachimihai mihicanoco. Jaarumo uco magacauguehicahi, uujoho ononoco muguubutimoro. ³⁸ Uujoho iimaahicahi Guihirubi uco jiiibogobadi. Jaanoti amiihai momoonihicahi amiihaico amiihai caani jiiibogobadi, nooboro.

Diito Caani, Iji.

³⁹ Jaanegui diito nuuhi: Miihai caani Abraham, noomoro.

Jaanegui Jesu diitoco nuuhi: Miyaano amiihai caani Abraham iicaruva diibo omoonibadi momoonijirahi. ⁴⁰ ¿Collih jaamo uco magacaaujirahi? Tolli iicanoco Abraham safooba mooniutih. Miïro amiihaico miyaanoco jiiibeguehicahi Moocaani uco unuubadi. ⁴¹ Jaanoti amiihai, amiihai caani omoonicibadi momoonihicahi, nooboro.

Jaanegui nuumo: Miihai ajeva seeme mihicatih, saafiro miihai caani Moocaani, noomoro.

⁴² Jaanegui Jesu diitoco nuuhi: Amiihai caani Moocaani iicaruva uco magaijijirahi. Uujoho diibogaagoti saahinihi, tajeebiitiro uujoho saahinitih diibo uco agalluhininegui saahinihi. ⁴³ ¿Collih

jaamo taajico muguubuhicatíhi? ¿Collíhi tajiibogoco mihimeguehícatíhi muguubunoco? ⁴⁴ Amíihai caani íji. Jaabo onoobadi momooninoco mihimeguehícahi. Míiro díibo síicijetiro imoyíicíibo miyaanaaco agaícaanoco, imoyíicítatíibo miyaanofaño íicanoco. Jaaboma miyaano chahahi, jihovoobo íicamaño sícamañooco íimaabo, bañífíira caani íicamaño bañífíibo. ⁴⁵ Jaanotí uujoho miyaanoco unuurunoco uco mimiyaaveguehícatíhi. ⁴⁶ ¿Nacu míijoho amíihaití saatoho ífusujiráhi tafífa sanogayíba ímití íicanoco? Jaabo miyaanoco onoonoco; ¿Collíhi uco mimiyaaveguehícatíhi? ⁴⁷ Moocaanítahe íicaabo, Moocaani íijico guubunícíhi. Jaanotí amíihai Moocaaníta mihícatímaño Moocaani íijico muguubugotíhi, nooboro.

Cristo Sahíijítiro íicacuubo.

⁴⁸ Jaaneguí judíomi íimusuíhi: Aívo miyaano íijoho samaríaooobo ídíicanoco íco monooono. Jaabo íjima díicahi, noomoro.

⁴⁹ Jaaneguí Jesu díitoco nuuhi: Uujoho íjima ícatíhi, uujoho Guíhirubíco bocíguehi. Jaaruuboco uco amíihai mobocígotíhi. ⁵⁰ Jaaruubo uujoho tafí bocígoco guínotíhi, íicaabo saafí uco obocígonoco íguíinooboro udugaacuubo. ⁵¹ Míyanotíro, míyanotíro amíihaíco neehí: Taajíco ímímíyaavogomo ífíníjíitíno guíjevefaño feejítíhi, nooboro.

⁵² Jaaneguí díiboco judíomi íimusuíhi: Jísu aívo ímíno magaaajúcuuhí íjima ídíicanoco. Míiro Abrahám, bu paryí Moocaani íimaamínaa ícamo paryí guíjeveuhi. ¿Míllí jaabo íijoho neehí: Taajíco uguubumo guíjevetímo ícají? nooboro. ⁵³ ¿Nacu íijoho mootadí Abrahám janaanící deevahí? Jaaruubo du guíjeveuhi, bu paryí Moocaani íimaamínaa ícaurumo guíjeveuhi. ¿Jaanotí míijoho íijoho ídíicaabo guíjevetííbo díicají? noomoro.

⁵⁴ Jaaneguí Jesu díitoco nuuhi: Uujoho tafíicoro bocígoruva, uuro obocígono jaaducáfetejítrahí. Guíhirubí uco bocíguehí díiboco amíihai Moocaani monooobo. ⁵⁵ Jaaruuboco amíihai magaaatíhi. Jaanotí uujoho naha gaajahí. Jaanotí: Uujoho díiboco gaajatíhi, nuuruva amíihaíbadi bañífífíirahí. Míyanotíro uujoho díiboco agaajamaño díibo íjico mooníhi. ⁵⁶ Míiro Abrahám amíihai tyadí ímo ímo ícauhí uco aatyímeagueuboro. Jaabo uujoho asaajínoco agaajacuuboro ímo ímo ícaubo, nooboro.

⁵⁷ Jaaneguí judíomi díiboco nuuhi: ¿Míllí jaabo cíncuentadíno fícabano díicátíibo, Abrahámco daatyímeuhi? noomoro.

⁵⁸ Jaaneguí Jesu díitoco nuuhi: Míyanotíro, míyanotíro amíihaíco neehí: Abrahám chahaunaacaro uujoho ícacuuhí, nooboro.

⁵⁹ Jaaneguí guíísíbanoco ícúumo díiboco íhaamíquí. Jaarunaa Jesu templojafaño afataníívuuboro díitofeenedí íhíínehíníuboro fuuhí.

Jesu Buheesuíhi Ífíívuunotíro Íhaallííno Ísícáuítíiboco.

9 Jaanaa Jesu afatyuubo atyímeuhi ífíívuunotíro aatyímeutííiboco. ² Jaabedítí íjííbogomínaa Jesuco dílluuhí: ¿Mojííbogomínaafí, míijoho ímítíco omooníumaño, jaani atyímetííbo fíívuuhí, caanímsí nacú díibo? noomoro.

³ Jaaneguí Jesu díitoco nuuhi: Caanímsí, díibo ícano ímítíco omooníumaño ícatíno. Jíllí Moocaani mítya dííboví íhífusucáfetequí ífíívuuno. ⁴ Mííro cuuje íicanohachuta uco agalluuhínííbo dudícamaajeque eetavehí. Jaanotí míhííjúcuudí mííhíínooba dudícamaaitacuutatíhi. ⁵ Mííro jíno jííníjehállírí íicanohachuta uujoho

jiinijeminaaco achicinihi, ⁶ nooboro jiinijehallivi ijiireuboro toonoco jiinima illiheeniuboro ijiiniri aatyimeutiibo aalliinoco nicuubo. ⁷ Jaaboro diiboco nuubo: Foobo Galluuba jicooba nifaihuri nitito, nooboro. Jaaba jicooba momo hebreo ijiri Siloe. Jaanegui initamaaijeuboro tahigoti atyimecuubo saauhi. ⁸ Jaanegui ifiitinominaa iticoni atyimeutiibo iicahicaunoco agaajaumo nuuhi: ¿Nacu jaani oono acasiivooboro nihibamico idilluhicaubo icatiibo? noomoro.

⁹ Jaanoti saatoho: Jihi, diibo, neehicauhi. Jaanoti saatoho: Sifi diibobadi ejeevaabo, neehicauhi. Jaarunofaño diibo neehicauhi: Uujoho diiboro, nooboro.

¹⁰ Jaanegui diiboco nuumo: ¿Milli jaano ico dihaalliino faayacafetehti? noomoro.

¹¹ Jaanegui diitoco iimusuubo: Jesu onoo jiinico ijiirema eetavooboro uco tahaalliinoco nicuhi. Jaaboro uco noobo: Foobo Siloe jicoobafaño nitito, eneenegui ofooboro nitijehinihi. Jaaneri tahaalliino uco faayacafetehinihi, nooboro.

¹² Jaanegui nuumo: ¿Cuuca jaabo icahi? noomoro.
Jaarunaa diibo: Co, gaajatihi, nuuhi.

Fariseomi Dilluhi Diiboco.

¹³ Jaadi diibo aatyimehicautiiboco satyuumo fariseomi imegavi.

¹⁴ Jaanaaca diiboco Jesu jiinibari ihaalliinoco ataabuuboro ubuheetesuufucuu jaguisifucuu. ¹⁵ Jaaboco siino fariseomi dilluhi: ¿Milli ico dihaalliino faayacafetehinihi? noomoro.

Jaanegui nuubo: Jiinibari uco tahaalliinoco nicuhiniibo. Jaanoco initamaainineri atyimehi, nooboro.

¹⁶ Jaanegui fariseomiti saatoho nuuhi: Diibo Moocaniti saatih. Jaamaño jaguisifucuco imino toomotiibo, noomoro.

Jaanoti saatoho neehicauhi: Imitiminaafi iicaruva jino sihidi ejeevano mityaco eetavejitiruubo, noomoro. Jaamaño diito sanoodimo dugaacamaaiuhi.

¹⁷ Jaamoro siino aalliivautiiboco nuumo: Jaanoti ijoho, ¿milli neehi dihaalliinoco afaayicihiniibediti? noomoro.

Jaanegui nuubo: Eti, Moocani iimaaminaafi, nooboro.

¹⁸ Jaarunaa judiomi miyaavuguutihi diibo ihaalliinoco afaayiciunoco icano. Jaamoro caanimisico cuhuvaumo igaajaqui. ¹⁹ Jaadi diitisiso dilluumo: ¿Naa jaani amiisi seemene aalliivatiibo ifiivuubo meneehicaabo? ¿Milli bu jaabo oono ihaalliinoma icahi? noomoro.

²⁰ Jaanegui caanimisi nuuhi: Jihi, magaajahi diibo moseemene aalliivatiibo ifiivunoco. ²¹ Jaaruno magaajatihi fine millihacho tahi atyimeebe, bu tolliro magaajatihi mijohohacho fine diiboco ubuheesuhininoco. Tahi diiboco midillu, diibo amiyaaburucu; tahi millihacho amihaico jibeguejiibo, noomisiro.

²² Jilli caanimisi nuuhi, judiomico iiguuimisiro, judiomi cajaanoyahacho, Jesuco: Cristo, onoomoco sinagogajafañoti magañiji, noomoro ifitacucasiuno nihicuti. ²³ Jilliti caanimisi: Amiyaaburucu tahi diiboco midillu, nuuhi.

²⁴ Jaanegui siino coovaumo ihaalliinoma achahauboco. Jaamoro diiboco nuumo: Moocanicoro dihimo. Jaanoti diibo imitiminaafi iicanoco mihai magaajahi, noomoro.

²⁵ Jaanegui diibo iimusuhi: Co, tahi fine imitiminaafi uujoho gaajatíhi. Iidiinocoro gaajahi uujoho aatyimeutiruubo jisumi aatyimeneque, nooboro.

²⁶ Jaanegui siino diiboco dilluumo: ¿Milli dihaalliinoco omoonihineri daatyimehi? noomoro.

²⁷ Jaanegui nuubo: Amiihaico jiibugucurahi. Jaarunoco mimiyaavogotimoro bu ¿collihi siino muguubujirahi? ¿Nacu bu amiihai tolliro diibo jii bogominaati mihicajirahi? nooboro.

²⁸ Jaanegui diiboco iibaumoro nuumo: Iijohonaa diibo jii bogominaafi. Jaanoti miihai Moise jii bogominaa. ²⁹ Miihai magajahi Moocaani Moisema ihiimaunoco. Jaanoti magajatihi diibo cuucatiobo iicanoco, noomoro.

³⁰ Jaanegui diibo iimusuhi: Toono aivo uudi sihidi jeevahi, cuucatiobohacho diibo iicanoco magajatino. Jaabo uco tahaalliinoco atyimesuubo. ³¹ Miiro miihairyo magajahi imitiminaaco Moocaani uguubunicitino. Jaanoti diibojaagodi iicamoro, diibo imogobadi omoonimoco icano guubuniciibo. ³² Siicijetiro guuburatatino saatohoba ifiivonotiro aatyimetiiiboco atyimesumo onoonoco. ³³ Jaani Moocaaniti isaatiruva milliba moonijitiruubo, nooboro.

³⁴ Jaanegui diiboco nuumo: ¿Iijoho aivo sihidi imitima ifiivuubo, miihaico diibeguejira? noomoro diiboco gañiiumo sinagogajati.

Jesuco Imiyaavogotimo Aatyimetiiibobadi Jeevahi.

³⁵ Jaanoco Jesu guubuhi diiboco agañiiunoco. Jaaboco atyimeuboro nuubo: ¿Iijoho miyaaveguehi Moocaani Achico? nooboro.

³⁶ Jaanegui diibo iimusuhi: Aivojiiibo, uco diibogo miijoho diibo miyaaveguequi, nooboro.

³⁷ Jaanegui Jesu diiboco nuuhi: Iiro daatyimecuuhi. Jino uujoho diibo iima ihiimaabo, nooboro.

³⁸ Jaanegui diibo Jesu imega ememuiivuuboro nuuhi: Miyaaveguehi, aivojiiibo, nooboro.

³⁹ Jaanegui Jesu nuuhi: Uujoho jijehallivi saahinihi dugaacuguiiha, atyimetimo ihatyimequi. Jaanoti atyimeme, atyimecuutimo iicaqui, nooboro.

⁴⁰ Jaanegui saatoho fariseomi diiboma iicaumo jilli diibo unuunoco uguubuumoro diiboco dilluumo: ¿Nacu bu miihai tolliro mahatyimetimo? noomoro.

⁴¹ Jaanegui Jesu diitoco iimusuhi: Amiihai aalliino ihifuvusutiruva amiihai imitima machahajirahi. Jaanoti: Mahatyimehi, monoomaño amiihai imitima mihicahi, nooboro.

Ovejami Mecuvi Ohoovicino.

(Heb 12.20; 1Ped 5.4)

10 Miyantiro amiihaico neehi: Ovejami mecufañño iguhugari jicafototiiiboro sinaagonodiro ofoobo nanivaminaafi. ² Jaanoti tomecufañño iguhugari ijicafotoobo naha diito tomominaafi. ³ Jaabedi iguhuga tomominaafi iguhugaco faayicifihi. Jaahugari ijicafotoboco ihovejami ihiimaatiro gaajacifihi. Jaamoco iticovocivi imomono icahi. Jaabo diitoco imemeri ocoovaaboro jahisivi iinusufiibo. ⁴ Jaadi jahisivi famoocoro ihiinusuboro ihime fooniciibo. Jaabo dojicuti ihovejami foonicihi diibo iimaaco agaajamoro. ⁵ Jaanoti agaajatiibo dojicuti footatimo. Jilli ro gaafimo diibediti diibo iimaaco agaajatiimaño, nooboro.

⁶ Jilli Jesu ooviciuboro diitoco nuuhi. Jaarunoco diito gaajaciutihi milli eneejirunoco unuunoco.

Jesu iimino Toomominaafi.

⁷ Jaadi bu Jesu siino diitoco nuuhi: Miyanotiro, miyanotiro amihaico neehi: Uujoho ovejami guhuga. ⁸ Iticoni tahimegavi asaaumo paryi nanivaminaa. Jaamo iimaaco ovejami gaajautihi. ⁹ Uujoho guhuga, tafañodi ijicafotoobo taajaji. Jaabo oveja iicanicibadi tomecufaño ijicafotooboro siino ihiinoobo ñaavahuco aatyimenicibadi icaji.

¹⁰ Jaanoti nanivaminaafi saanicahi inaniquiro, igaicaaquiro, ifinisiquiro icano. Jaanoti uujoho saahinihi fiivoma mihicaqui, sihidi janaanici toonoma mihicaqui. ¹¹ Uujoho miya toomominaafi; Miïro miya toomominaafi iicaabo ihovejamihallivi ifico acinicahi. ¹² Jaanoti ijaadaguiiharo ootoomoobo jicu diitojaago asaanoco aatyimeebere ihovejamico ejevesuhiniïbora iicojiti gaanicahi ita iicatimaño. Jaanobuuna ijicu asaaboro diitoco buhigovi gavaracunicahi. ¹³ Jaabo diibo diitoco jeevesunicahi jilli ijaadaguiiharo ududicamaaïmaño. Jaamaño diitoco jeevotatiïbo.

¹⁴ Jaanoti uujoho iimino toomominaafi. Jaamaño taatyaco gaajahi. Jaabadiro bu diito uco gaajahi taaty iicamaño. ¹⁵ Uco bu oono Guihirubi agaajabadi, jaaboco bu uujoho gaajahi icano. Jaamaño tahovejamihallivi uujoho tafiico acihi. ¹⁶ Tolliro bu saatoho tahovejami icahi jimecuoto iicatimo. Jaamoco tolliro sivaji. Jaamo tahiimaaco guubuji. Jaamo samooro icaji. Jaamo toomominaafi saafiico icaqui, ¹⁷ uco Guihirubi gajijhi, tafiico diitohallivi aaciïbora, siino ubuheetejimaño. ¹⁸ Miïjoho uco guijenijitirahi, jilli uuro iimogobabadi tafiico aciji. Jaabo iguijeveruubo siino dojicuviro buheeteji mityama iicamaño. Jilli mooniqui Guihirubi uco tajiïbauhi, nooboro.

¹⁹ Jilli unuuneri judiomi siino dugaavocasiuhi. ²⁰ Jaaboti sihidi saatoho neehicauhi: Ijïma iicaabo jilli jeegavucuubo. ¿Collïhi jaaboco muguubunicahi? noomoro.

²¹ Jaarunaa saatoho neehicauhi: Ijïma iicaabo jilli iimaatatihi. ¿Nacu ijï ihaalliïno aatyimetimoco atyimesujirahi? noomoro.

Jesuco Judiomi Gaayicigotïhi.

²² Jaanaa Jerusalevi eetavuumo jïïbaimoco templojaco Moocaanicoro ijeecevehicaqui ificuuno jïïbaimoco jïïnijadiïhivi. ²³ Jaasumi Jesu templojahallidi, Salomon goohasino onoohasijeri igoboro feehicauhi. ²⁴ Jaabohallidi judiomi emecuvovaumoro diiboco nuuhi: ¿Mihachuta jaabo mihaico, esamaaisuuboro diicaji? Miyaano ijïjoho Cristo idiicahachijï mihaico foovono diibugucu, noomoro.

²⁵ Jaanegui Jesu diitoco nuuhi: Amiihaico neehicacuurahi. Jaarunoco mimiyaaveguehicatihi; Miïro Guihirubi atajiïbabadi uujoho omoonino toono foovono uuti jïïbeguehi. ²⁶ Jaarunoco amiihai mimiyaavogotïhi, tahovejamioto mihicatimaño, amiihaico eneehnicubadi. ²⁷ Miïro tahovejami uco tahiimaati gaajahi. Jaabadiro bu diitoco uujoho gaajahi. Jaamaño tadyojicuti foonicimo. ²⁸ Jaamoco uujoho ifininjino fiivoco acihi. Jaamo ufucuro guijevejitihi. Jaamoco miïhaiñooba tahusefañoti dumitiicijitihi. ²⁹ Guihirubi uco diitoco aciubo famoohallïnoociviro sihidi ejeevamaño. Jaamoco bu cajiïyooba Guihirubi usefañoti dumitiicijitirahi.

³⁰ Jaamisi uujoho, Guihirubi icano mihicahi. Jaarumisi saafiuro mihicahi, nooboro.

³¹ Jaanegui judiomi siino guisibanoco iciuhi diiboco ihaamiqui. ³² Jaanegui Jesu diitoco nuuhi: Miïro sihidi iminehejeque amiihai imefeenevi eetavehicahi Guihirubi mityari. Jaamo, ¿conohalliti uco magaaicaaujirahi? nooboro.

³³ Jaanegui judiomi diiboco iimusuuhi: Imino omoonihicanohalliti ico momoonigotihî; Moocaaniditi imitino diimaahi miyaminaafi idiicaabo: Uujoho Moocaanibadi jeevahi, onoonohalliti, noomoro.

³⁴ Jaanegui Jesu diitoco nuuhi: Caatinihaamefaño Moocaani jilli neehi: Amiihai Moocaanibadi mejeevamo, nooboro. ³⁵ Miïro jaanoco famooro amiihai magaajahi, Caatinihaamefaño onono gaññicafototino iicafinoco. Jaamaño miïro Moocaani iijico agaayiciumoco Moocaani nuuhi: Amiihai Moocaanibadi mejeevamo, nooboro. ³⁶ Jaabadi Moocaani ijeevadi iiciuboro agallubediti: ¿Milli Moocaaniditi imitino iimaabo, meneejirahi, Moocaani Seemene uujoho, onoonoditi? ³⁷ Jaabo Moocaani omooninoco uujoho omoonitihachijî uco mimiyaavoguedino. ³⁸ Jaanoti omoonitihachijî uco mimiyaavogotirumo toonoco mimiyaavogo. Jaanoco magaaamoro mimiyaavogo misi Moocaanima saafiuro mihicanoco, nooboro.

³⁹ Jaanoma iicaumo diiboco siino gaayiciujirumo. Jaarunofaño diito usefañoti Jesu taajauhi.

⁴⁰ Jaaboro siino fuubo Jordan onegueehivi iticoni Jua tomañovi initihicauhigo. Jaaboro tahi icahicaubo. ⁴¹ Jaabojaah sihidi miyaminaa asaamoro, neerumo toonoco mimiyaavogo. Jaanoco magaaamoro mimiyaavogo misi Moocaanima saafihicauhi: Miyaano Jua sihidi ejeevanoco moonihicautihî. Jaanoti diibediti Jua eneehicaubadi paryi aivo miyaano, noomoro ⁴² sihidi saatoho tomañoto Jesuco miyaavuguuhi.

Lazaro Iguijeveuno.

11 Jaanaa saafi Betania cuumioobo guihuvauhi, Lazaro onoo. ¹ Jaacuumiri icahicaumife Maria, bu inago Marta icamife.

² Jaanaaca diigo Maria nahabo Lazaro onoo guihuvauhi. Jaago diigo Maria Aivojiibo Jesuco facicifaihuri ejeesuugoro itihaiñoco imeebaiguiri ifilluhicaugo. ³ Jaamife Jesujaago jii bogoco galluui: Aivojiibo, iijoho agajjihicaabo guihuvahi, noomifere.

⁴ Jaanoco Jesu uguubuuboro nuuhi: Toono guihuva guijeve icatino; jilli Moocaani mitya toonofeenedi ihifusucafetequi iicano, bu uujoho Moocaani Seemene toonofeenedi imityaco igaaasuqui icano, nooboro.

⁵ Jaabo Jesu Lazaromico gajjihicauhi. ⁶ Jaano Lazaro iguihuvaunoco Jesu guubucuruubo, mifucuci siino tomañoviro icauhi. ⁷ Jaanobuunati iijii bogominaaco nuubo: Masiigo siino Judea jii niije jagovi, nooboro.

⁸ Jaanegui diiboco diito nuuhi: Jii bogominaafi, tahigo du ico judiomi gaicaahinirahi. ¿Jahigo bu siino feeji? noomoro.

⁹ Jaanegui diitoco Jesu nuuhi: ¿Nacu safucu, nihiba oovo fahuseeci motihaiti minoooci icano icatihî? Cuuje mihigomo mananigaivatatihî nihiba foovono aachicinimaño. ¹⁰ Jaanoti fucu iigoobo nanigaivafihî, fucu esesetimaño, nooboro.

¹¹ Jaanobuunati diitoco nuubo: Mogataavominaafi Lazaro icigaabo aaicotihica. Jaanegui feeji aicusutequi, nooboro.

¹² Jaanegui iijii bogominaa diiboco nuuhi: Aivojiibo, icigahicadi bu jei aiquejiibo, noomoro.

¹³ Tolli Jesu diitoco nuuhi: Lazaro guijevecuuhi unuujirunoco tolli nuubo. Jaanoco diito esiciniuhi: Miya cigacoro fine noobo, noomoro. ¹⁴ Jaadi jari Jesu diitoco foovono nuuhi: Lazaro guijevecuuhi. ¹⁵ Jaano amiihaidi aivo imino uujoho tahi iicatinu. Jaaneguiiha masiigo diibojaago. Jaamo amiihai mimiyaaveguehi. Jaaneri uujoho imo imo icahi, nooboro.

¹⁶ Jaanegui Tomas onoboco, gaatyaba eneehicaubo, inahabomi Jesu jiiibogominaaco nuuhi: Masiigo, tolliro bu miihai Jesuma miguijevequi, nooboro.

Jesu Buheetebe, Fiivoobo Icano.

¹⁷ Jaanaa Jesu gaseuhi Lazaroco iciiuno mifucuci, mifucuci icanobuunati.

¹⁸ Jaano Betania cuumi icauhi Jerusaleti minooci, siinotifeenedi icano kilometronohachuta. ¹⁹ Jahigo sihidi judiomi Martamifejaago fuuhi inahabo iguijeveunoti diitifeque ijacusuqui. ²⁰ Jaanaa Marta Jesu asaunoco uguubuugoro fuuhi diiboco acabacutuugo. Jaanoti Maria jaahere fitafutuui. ²¹ Jaagoro Marta diiboco nuuhi: Aivojiiibo, jineeri diicahiniruva tagaifiibo guijevehinijitirahi.

²² Jaarugo uujoho gaajahi Moocanico paryi idillunoco ico aacijnoco, noogoro.

²³ Jaanegui Jesu diigoco nuuhi: Dinahabo siino buheeteji, nooboro.

²⁴ Jaanegui Marta nuuhi: Jiihi, uuro gaajahi ufucu siino buheetefucuvi siino ubuheetejinoco, noogoro.

²⁵ Jaanegui Jesu diigoco nuuhi: Uujoho buheetesuubo, uujoho fiivoobo; uco imiyaavogomo chuumucuurumo buheeji. ²⁶ Jino paryi iicamo uco imiyaavogomo, ifinijitino guijevefaño icajitih, nooboro diigoco nuubo: ¿Naa miyaaveguehi jinooco? nooboro.

²⁷ Jaanegui nuugo: Jiihi, Aivojiiibo, uujoho miyaaveguehi ijoho Cristo Moocaani Achi jiiinijehallivi asaaguubo idiicanoco, noogoro.

Jesu Lazaro Ciihohjhallivi Taaui.

²⁸ Jilli unuugoro Marta fuuhi Maria inagoco toovono unuutuugo: Jiiibogominaafi gasecuui. Jaabo ico coovahi, noogoro.

²⁹ Jaanoco Maria uguubuugoro goovano aganiivuugoro Jesujaago fuuhi.

³⁰ Jaanaa Jesu tuucuumifañehi iifutuutihica Marta diiboco aatyimeumañoviro fitafutuubo. ³¹ Jaanoco judiomi diitifeque ijacusuqui asaamo iijafaño iicaumo atyimeuhi Maria goovano aganiivuugoro ufuunoco. Jaamoro nuumo: Iicijihjjaago foogo tahi itaatequi, noomoro idojicuti fuuhi.

³² Jaanaa Maria Jesuvi iifutuugoro diiboguino ememiiivuugoro diiboco nuuhi: Aivojiiibo, jineeri diicahiniruva tagaifiibo guijevejitirahi, noogoro.

³³ Jaanoco Jesu diigo taagoro asaunoco, bu tolliro judiomi diigoco anahaboniumo taamoro asaunoco icano aatyimeuboro sihidi idaasuvuubo. Jaaneri diiboco ijeebii niji niji isinafutuuneguiiha, ³⁴ diitoco dilluubo: ¿Conoovi miciihinih? nooboro.

Jaanegui nuumo: Aivojiiibo, saabo juuga meeciva, noomoro.

³⁵ Jaaneri Jesu taaui. ³⁶ Jaanoco aatyimeumoro judiomi nuuhi: Memeeeci sihidi fine diiboco gajihicaubo, noomoro.

³⁷ Jaanoti saatoho nuuhi: ¿Jaani aatyimeutiiboco atyimesuubo, jineeri iicahiniruva Lazaroco iguijevete fine buheesuhinijitiruubo? noomoro.

Lazaroco Ubuheetesuuno.

³⁸ Jaanaa Jesu siino aivo iidaasuvuuboro iciihoji imegavi fiitivuui. Jahoji ifaagajiguinojaagovi eseediumoro guisibari ihimegaco afabaacihigo.

³⁹ Jaaboro Jesu nuuhi: Iguisibaco buhigovi magañi, nooboro.

Jaarunaa Marta diiboivi nago nuuhi: Aivojiiibo, aivo fine usucuuno mifucuci, mifucuci icano icacuuno, noogoro.

⁴⁰ Jaanegui Jesu diigoco nuuhi: ¿Nacu ico nootihi: Imiyaavogohachiiji Moocaani mityaco daatyimeji ico duhu neehi? nooboro.

⁴¹ Jaanegui iciihoji imegati iguiisibaco gañiiumo. Jaadi Jesu niquejeque emeeciuboro nuuhi: Guihi, ico graciaco acihi uco uguubuneguiiha.

⁴² Jaarunofaño gaajacuuhi fahijivaró uco uguubuhicanoco. Jaarunofaño jito miyaminaa iicamedí neehi; uco ijoho agalluuhininoco imiyaaveguequi, nooboro sefano nuubo: ⁴³ ¡Lazaro, isivi dihiino! nooboro.

⁴⁴ Jaasumiro ichuumuhu iinuuhi, itihaiño, ihusene icano miniciniibo. Tolliro bu ihime ijeevadiobaryuri miniciniibo. Jaadi Jesu diitoco nuuhi: Diiboco misinaayu ifeequi, nooboro.

Jesuco Iguijeniqui Iimaacasiuno.

(Mt 22.1-5; Mr 12.1-2; Lc 22.1-2)

⁴⁵ Jaanoco judiomi Mariamifema asaamo aatyieumoro diiboco sihidi miyaavuguumo. ⁴⁶ Jaarunaa sanoodimo fariseomijaago ufuumoro diitoco jiibuguumo Jesu omooniuuoco. ⁴⁷ Jaanegui fariseomi, sacerdotemi aivojito icamo fagominaaco igaiyiicumoro nuuhi: ¿Milli fine momoonijirahi? Aivo sihidi ejeevanoooco moonihicaabo. ⁴⁸ Miiro diiboco milli momoonitihachiiji famooro diiboco miyaavegueji. Jaachiiji romanomi asaamoro Moocaani iijaco finisuvajimo, bu tolliro moojiinije miyaminaaco finisujimo icano, noomoro.

⁴⁹ Jaanegui Caifas diitoobo tusumi sacerdotemi aivojiiiboti iicaubo diitoco nuuhi: Amiihai aivo magaajatíhi. ⁵⁰ ¿Nacu mehesiciniitíhi saafiuro famoohalliviro iguijevejirunoco faacuumiminaaro mifinjirumohallivi? nooboro.

⁵¹ Ijeebiitiro tolli nuutiibo; tusumi sacerdotemi aivojiiiboti iicaumaño Moocaani diibo jeebiifaño eesaayunoco nuubo. Jesu tuucuumiminaahalliviro iguijeveujinoco imegaviro jiibuguubo. ⁵² Jilli tuucuumiminaahalliviro icaútino, tolliro bu Moocaani seeme fahigova iicamoco igaiyiiciqui.

⁵³ Jaamaño tusumitiro esafutuumo Jesuco iguijeniuujinoco.

⁵⁴ Jiliti Jesu foovono igucuutihi judiomifeenedi jilliro toonoti fuucuubo sicaihigovi toonoti fiitino iicaucuumi Efrain onocuumijaagovi. Jahi ijiibogominaama fitafutuubo.

⁵⁵ Jaanaa fiiticuuno Pascua judiomi jiiibaimo iicaujino. Jaacuumiti sihidi saatoho Jerusalevi fuuhi imegaviro ijeevamaje iicanicibadi ifiinoco iimibachuqui. ⁵⁶ Jaanaa Jesuco guinehicaumo. Jaamoro templojafaño icamo noocasihicaui: ¿Milli mehesicinihi, fine saajiibo? ¿Nacu fine jino jiiibaimovi saajitiibo? noomoro.

⁵⁷ Jaanaa fariseomi, sacerdotemi aivojito icamo miyaminaaco tajiibauhi. Saatohoti Jesuco mahatyimehachiiji mihaico mijiiibogo, magaayicimoro diiboco micivojaaniciqui, noomoro.

Betaniavi Jesuco Facicifaihuri Jeesuogo.

(Mt 22.6-13; Mr 12.3-9)

12 Jaanaaca Pascua jiiibaimoco eheetavuujino sahuse juugahuseti safucu icano icaunaaca Jesu fuuhi Betaniavi tuucuumivi Lazaro iguijeveuboco ubuheesuubo iicauhigo. ² Jahi diibedi eetavuumo machutaaco. Jaanoco Marta ifehicaui. Jaanoti Lazaro amachumofeeneri

icachicauhi Jesuma. ³Jaanaaca Maria sivauhi sano libra ticovovi nardo ononoo facicifaihuco aivo iimino guiraano ijaada iicanoco. Jaagoro tofaihuri Jesu tihaiñoco ejeesuugoro imeebaiguiri filluhicauhi. Jaaneri tooja gahafuuhi ifacicifaihu usuri. ⁴Jaanegui ijiibogominaati saafi nuuhi Juda Iscariote Simon achi Jesuco aaciujiiibo: ⁵¿Collihi jana jino facicifaihuco trescientos denariori anaajemere iidaasufiimoco acitimo bañamaaihi? nooboro.

⁶Jilli nuubo iidaasufiimoco agaiijumaño icatino. Jilli nanivaminaafi iicaumaño. Jaaboco diito inihibami lleegucuco utuumusuunoti nanihicaubo. ⁷Jaanegui Jesu diiboco nuuhi: Jaafa tolli moonigo, tacihihoji imegavi uco jilli moonigo. ⁸Miïro amiihaifeenevi fahiijivaro iidaasufiimo icaji. Jaanoti uujoho amiihaima fahiijivaro icajitïhi, nooboro.

Lazaroco Igujeniqui Ihiimaano.

⁹Jaanaa ajashutimo judiomi guubuuhï Jesu Betaniari iicaunoco. Jaamoro tahi fuumo. Jaaruno Jesuguiiharo icatino, tolliro bu Lazaroco Jesu ubuheetesuuboco ihatyimequi. ¹⁰Jaamoro sacerdotemi aivojito Lazarohallivi iimaacasiuhi, tolliro bu diiboco igaicauqui. ¹¹Diiboti sihidi saatoho judiomi Jesuco imiyaavuguumoro udugaacamaaiunoma iicaumo.

Jerusale Cuumifaño Jesu Ijicafotono.

(Mt 22.1-11; Mr 12.1-11; Lc 12.28-40)

¹²Jaanaa sihidi miyaminaa Pascua jiiibaimovi Jerusalevi fuuhi. Jaamo, jaano sesevedi guubuumo Jesu tuucuumivi agaseujinoco. ¹³Jaamoro imohono jaainoco iquitumoro diiboco cabaacutummo sahomoro: iHosana! iJaafa imocafotoobo! Imicani Moocaani memeri asaabo; Israel miyaminaa aivojiiibo, noomoro. ¹⁴Jaanaa Jesu burroco aatyimeuboro diibohallivi casïvuubo. Caatinihaamefaño onoobadi: ¹⁵Diiguetejirahana Sion cuumi; Meeci oono dihaivojiiibo burrogayihalliri giciniiboro saahi, noonoro onoobadi. ¹⁶Jaarunoco ijiibogominaa gaajautïhi; jari Jesu niquejefaño ufuunobuunati gaajaciumo Caatinihaamefaño onociniubadi omoonunoti. ¹⁷Jaanaa Jesu Lazaroco ubuheetesunoco atyimeumo jiiibeguehicauhi Jesu omooniboro ubuheetesunoco. ¹⁸Jaanoma icamo miyaminaa Jesu asaaboco cabaacutuuhï sihidi ejeevano mityaco omoonunoco uguubuumoro. ¹⁹Jaanoma iicamo fariseomi noocasiuhi: Mahatyimecuhi fine jino miïhairyo milliba momoonitinoco. Memeeeci paryi miyaminaa diibo dojicuti ofoonoco, noomoro.

Griegomi Jesuco Guinehi.

²⁰Jaanaaca Jerusalevi Pascua jiiibaimovi Moocaanico iimequi ufuumofeneri, bu icaumo saatoho griegomïoto. ²¹Jaamo Felipejaago asaamoro diiboco nuuhi: Aivojiiibo, miïhai mihimeguehi Jesuco mahatyimeneque, noomoro. Jaabo Felipeu Betsaida cuumioobo Galilea jiiinijeri iicacuumioobo.

²²Jaanegui Felipe ufuuboro Andreque jiiibugutuuhï. Jaadi famisicïro ufuumisïro Jesuco jiiibugutuuhï. ²³Jaanegui Jesu nuuhi: Tufucu mihicacuuhï, uujoho Miyaminaafibadi Ifïvuubo sihidi jeevanofaño iicajifucu. ²⁴Miyanotïro, miyanotïro amiihaico neehi: Trigo noovatayï jiiinijehallivi aacotoyïro jiiinijefaño ofooyï chuumucuyibadi icahi. Jaaruyï ihiinoyïro janaanïci guiraano noovafïhi. Jaanoti abasuratïyi sayïïro icafïhi.

¿Milli bu guiraatejiruyi? ²⁵ Jaabadi ifiico agaijiibo ifiico mitasuji. Jaanoti jiihahallivi ifiico agaijitiibo ifinijitino fiivoguiiha ficuui. ²⁶ Cajaatyohacho tadyojicuti asaagomo uco ijeeceivequi. Jaamo uco ejeevivomo uujoho icahigo tolliro icajimo, bu jaamo cajaatyohacho uco ejeevivomoco Guihirubi bocigusuji.

Jesu Iguijevejinoco Jiibeguehi.

²⁷ Jisumi uco tajeebi gaihuiba icahi. ¿Jaanoco milli fine uujoho neeji? ¿Fine Guihi uco jilli icajinoti taajasu, neeji? Eti du, tooneguiiha uujoho saahinihi. ²⁸ Jaanegui Guihi dimomoco cahacisu, nuubo. Jaasumiro niquejefañoti guubuvusuuno: Cahacisucuui, bu siino cahacisujihica, unuuno.

²⁹ Jaanaa iicojiri miyaminaa iicaumo niquejefañoti unuunoco uguubuumoro: Sisi iimaahi, neehicauhi. Jaanoti saato: Moocaani toomominaafi iimaahi, neehicauhi.

³⁰ Jaanegui Jesu nuuhi: Uguuiha jino niquejefañoti Moocaani iimaatihi, amiihaiguiiha ihiimaano. ³¹ Jisumi jino jinihahallivi imiti jaadaco acicafeteji, bu jisumi jino fji jije aivojiibo icahicaabo buhi gañicafeteji.

³² Jaabo uujoho guijeve imohobujehallivi jinihahalliti aganiivoodi, paryi famoocoro tajaagovi sivaji, nooboro.

³³ Jilli neehicaubo coguijeveri fine iguijevejinoco diitoco agaajasuubo.

³⁴ Jaanegui miyaminaa iimusuuhi: Miho miihai muguubuhicahi tajiibahaamefaño: Cristo asaadi guijevetiibo icaji, onoonoco. Jaano icanaaca, ¿milli jaabo ijoho neehicahi: Miyaminaafibadi Ifiivuubo guijeve imohobujehallivi gañiyicisucafeteji, neehicahi? ¿Nacu, miihoho diibo Miyaminaafibadi Ifiivuubo? noomoro.

³⁵ Jaanegui Jesu diitoco nuuhi: Amiihai feenerihiica gueenejisuno icajino seseene aachicinino. Jaanegui mihigo amiihaifeeneri jino seseene aachicinino iicanohachuta, amiihahallivi civono iijitinaacaro. Jaanoti civohi igomo gaajatihi ihimega ofoohigoco. ³⁶ Jaanegui amiihaifeeneri sese iicanohachuta seseque mimiyaavogo. Jaamo seseene aachicinino miyaminaa mihicahi, nooboro. Jilli Jesu ihiimaahicaudi ufuuboro diitediti fataniivutuui.

Judiomi Imiyaavogotino.

³⁷ Diitofeenevi Jesu ajashutino sihidi ejeevanehejeque eetavehicacuurunaaca diiboco miyaaveguehicauto. ³⁸ Moocaani iimaaminaafi Isaia unuuno imiyaavequi iicaumaño. Miho noono:

Aivojiibo, ¿miihoho nacu mojiibogoco miyaaveguehi?

¿Miho fine Moocaani imityaco ifusuhi? noonoro.

³⁹ Jilliti miyaaveguehicauto. Jaaboro bu Isaia caatiniuhi:

⁴⁰ Diito aallinoco Moocaani jabaiyitusuui; tolliro ijeehinoco kuhufutusuubo ihaallinero atyimetimo iicaqui, tolliro bu ijeehiri esicinitimo iicaqui. Jaamoro tajaasaamoco uujoho buheesudino.

⁴¹ Jilli nooboro Isaia Jesuditi iimaauhi Jesu aivojico aatyimeuboro.

⁴² Jaarunofaño sanoodimo ihaivojito Jesuco miyaavuguui. Jaarumo foovono neehicautihi fariseomi nihicuti diitoco sinagogajati gañitimo iicaqui. ⁴³ Miyaminaa diitoco obocigomocoro imuguumo Moocaani obocigonoco imogotimo iicaumaño.

Jesu Iiji Miyaminaaco Dugaacusuji.

⁴⁴ Jaanaa Jesu sefano nuuhi: Uco imiyaavogomo, ucoro miyaavogotíhi tolliro uco agalluuboco miyaaveguehi. ⁴⁵ Tolliro bu uco atyimeme uco agalluuboco atyiméhi. ⁴⁶ Uujoho seseene aachiciníibo jiiñjehallivi saahinihi uco imiyaavogomo civohi icatimo icaqui. ⁴⁷ Jaanoti taajico guubucuurumo imiyaavogotimoco uujoho: Diito imitico, neejitíhi. Uujoho jiiñjehallivi saahinítihi jiiñje miyaminaaco ciijigaifaño gañisuqui, jilli taajasuqui saahinihi. ⁴⁸ Jaanoti uco iimogotimoro taajico imiyaavogotimoco uujoho eneehicano, diitoco ufucu niinofucu ciijigaifaño gañisuji. ⁴⁹ Uujoho tajeebiitiro iimaahicatíhi Guihirubi uco agalluhiniibo atajiihahinibadi iimaahicahi, jiiñbeguehicahi icano. ⁵⁰ Jaabo uujoho gaajahi Guihirubi tajiiba ifniñjitino fiivoco aacino. Jaamaño uujoho iimaahicahi Guihirubi unuubadi, nooboro.

Jesu Ijiihogominaa Tihaiñoco Nitíhi.

13 Jaanaa safucurucu icauno ihimega Pascua jiiñbaimo icaujino. Jaanaa Jesu gaajacuui, jiiñjehalliti Caanijaagovi ufuujino oovovi iifutucuunoco. Jaabo ita jiiñjehalliri iicamoco gaajihicaubo. Jaaboro iifusuubo diitoco sihidi agaijino finitino iicajinoco.

² Jaamo niinoono amachuumo icaunaaca iji Juda Iscariote Simon achi eesamaajefaño jiiñhacucuui Jesuco aacujinoco. ³ Jaanaa Jesu Caani diiboco fanoovaco ihusefaño aaciunoco agaajauboro, bu tolliro Moocaniti asaaunoco, bu siino diibojaago ufuujinoco icano agaajauboro. ⁴ Amachuumañoti agañiivuuboro igaachehuco jujuvuubo. Jaaboro ifillubaryuri ifeenebeque isiyaavuuboro ⁵ nifaihuco butajefaño ificuuboro ijiihogominaa tihaiñoco nitíhicaubo. Jaaboro ifillubaryuri isiyicinineri filluhicaubo.

⁶ Jaanaa Simon Pedrovi iifutuubo. Jaanegui Pedro diiboco nuuhi: Aivojiiibo, ¿milli jaabo ijoho uco tatyihaiñoco nitíji? nooboro.

⁷ Jaanegui Jesu diiboco nuuhi: Jino uujoho omooninoco jisumihiica ijoho gaajatíhi. Jaaruubehi ufucu gaajaji, nooboro.

⁸ Jaarunaa Pedro diiboco nuuhi: Chahano, ufucuro tatyihaiñoco ijoho uco nitíjitíhi, nooboro.

Jaanegui Jesu diiboco nuuhi: Ico inítitihachiiji tajaagodi diicajitíhi, nooboro.

⁹ Jaanegui Simon Pedro nuuhi: Aivojiiibo, tatyihaiñocorota nitidino, tollirota bu tahusene, tañigai icanoco niti, nooboro.

¹⁰ Jaanegui diiboco Jesu nuuhi: Ejeecuubo siino faabohoro jetatíhi itihaiñocoro nitífihi imihinivatimaño. Jaabadi amiihai mimihinivatíhi. Jaarumo famooro icatino, nooboro.

¹¹ Tollí nuubo diiboco aaciujiiiboco agaajaumaño, famooro mimihinivatíhi, nuubo.

¹² Jaadi diito tihaiñoco Jesu inítihicaudi siino igaachehuco ijicafutuuboro casiivuubo. Jaaboro diitoco nuubo: ¿Magaajahi jino uujoho amiihaico omooninoco? ¹³ Miiro amiihai uco meneehicahi jiiñhogominaafi, aivojiiibo icano. Eti, miyaanoco meneehicahi, uujoho diibo iicamaño. ¹⁴ Jaaruubo amiihai tihaiñoco inítibadi, bu amiihai sanoomiro amiihai tihaiñoco fahigovavi miniticasihicaji. ¹⁵ Miiro amiihaico jiiñbeguehicacuui. Jaamo uujoho omoonihicabadi momoonihicahi. ¹⁶ Miyanotiro, miyanotiro

amihaico neehi: Chahaabo saafi jeecivominaafi ihaivojii bo janaaniciivi iicaabo. Tolliro bu chahaabo siinojaa agalluubo diiboco agalluubo janaanici iicaabo. ¹⁷Jinoco magaajamoro jilli momoonihachiiji miyanotiro imino mihicaji.

¹⁸Fameeditiro amiihaiditi iimaatihi. Uuro gaajahi amiihaico uujoho iichininimoco. Jaarunofaño, jaafa tolli icano, Caatinihaamefaño onoono imiyaavequi. Uuma sano amachuhicaruuho: Taminaafiti minifetehi, onoono. ¹⁹Jaaneui amiihaico imegaviro jino neehi. Jaamo tolli iicacuudi magaajamoro mimiyaaveguehi uujoho diiboro iicaabo, iicanoco. ²⁰Miyanotiro, miyanotiro amiihaico neehi: Uujoho agalluuboco agaayicimo, uco bu tolliro gaayicichi. Jaamo uco agaayicimo, tolliro bu uco agalluuhiniiboco gaayicichi, nooboro.

Jesu Jiibeguehi Juda Diiboco Aacijinoco.

(Mt 22.20-25; Mr 12.17-21; Lc 22.21-23)

²¹Jilli Jesu unuuboro gaajaciuhi ifi ijeebiifaño gaihuiba iicaunoco. Jaaboro foovono nuubo: Miyanotiro, miyanotiro amiihaico neehi: Amiihaiti saafi uco aciji, nooboro.

²²Jaaneui ijiibogominaa fahigova meecasiuhi: ¿Cajaaniti fine noobo? noomoro. ²³Jaanaa saafiico ijiibogominaati Jesu agaijiihaubo diibovi fitociniuhi. ²⁴Jaaboco Simon Pedro ihaalliiri tajiibauih Jesuco idilluqui cajaaniditi Jesu tolli unuunoco igajaqui. ²⁵Jaaneui diibo Jesuvi fañogayi ifiitivuuboro diiboco dilluubo: ¿Aivojii bo, cajaaniti diibo? nooboro.

²⁶Jaaneui nuubo: Toovotino uujoho diiboco maahuco amatyusuuboro aciji, nooboro imaahuco amatyusuuboro aciubo Juda Iscariote Simon achico. ²⁷Jaanoco Juda amachuusumiro Satanas iji diibo jeebiifaño jicafutuuhi. Jaaneui Jesu diiboco nuuhi: Omoonijinoco jisumiro moonicu, nooboro.

²⁸Jaarunoco diito amachuumo gaajaciutih milliti diibo tolli unuunoco. ²⁹Jaanoti saatoho esamaaihucauhi. Juda inihibami lleeucuma iicaunegi diiboco baacho, noobo: Naajecu jisumiro jiibaimovi mucuujiivaachujirunoco. Jaanoti iidaasufiimoco siinoti ihaciqui noobo baacho, noomoro. ³⁰Jaabo Juda amachuuboro tahigoti iinuuruubaaca mihijicuuhi.

Bohono Tajiiba.

³¹Jaabo Juda ufuunobuunati Jesu nuuhi: Jisumi jari uujoho Miyaminaafibadi Ifiivuubo cahacisucafeteji. Jaabofeenedi Moocaani boci cahacisucafeteji. ³²Jaabo uujoho Miyaminaafibadi Ifiivuubo Moocaani bocico iifusumaño Moocaani, bu ifusuji Illi bocico. Jaanoco jisumiro iifusucuujii bo. ³³Taseeme amiihaima uujoho guenenene icacuujitih: Uco miguiinejirahi. Judiomoco eneehinibadi. Tolliro bu amiihaico neehi: Uujoho ofoohigo amiihai mefeelijitih. ³⁴Jaaneui amiihaico bohono tajiibaco uujoho acihi. Fahigova magaijicasi. Amiihaico uujoho agaijibadi fahigova magaijicasi. ³⁵Jaamo fahigova magaijicasihachiiji miyaminaa gaajaji miyaano amiihai tajiibogominaa mihicanoco, nooboro.

Jesu Neehi Pedro Diiboco Utuunamaaijinoco.

(Mt 22.31-35; Mr 12.27-31; Lc 22.31-34)

³⁶Jaaneui Simon Pedro diiboco nuuhi: ¿Aivojii bo, cuuca feeji? nooboro. Jaaneui Jesu diiboco iimusuuhi: Uujoho jisu ofoobo dojicuti iijoho feejitih, ufucu jari tadyojicuti feeji, nooboro.

³⁷ Jaanegui diiboco Pedro nuuhi: ¿Aivojiiibo, milliti jaabo jisumi didojicuti feejitirahi? Dihallivi uujoho tafiico aacinoco imeguehi, nooboro.

³⁸ Jaanegui Jesu diiboco nuuhi: ¿Nacu difiico ijoho tahallivi daacjirahi? Miyantiro ico neehi: Jaafañiino catava ojitinaacaro, uco agaajaruubo uco ijoho tuunamaaiji mifooci, safo idiino, nooboro.

Jesu Moocaanijaa Ofoono Jiihai.

14 Amiihai jeebiifañodi mihiguetedino. Moocaanico mimiyaavogo, bu tolliro uco mimiyaavogo. ² Guihirubi ijafaño mihicajimañeheje sihidi icahi; tolli icatiruva amiihaico uujoho neejitirahi. Jaanegui feehi amiihai imega amiihai mihicajimañehejeque imibachuqui. ³ Jaabo jino ofoobo amiihai mihicajimañehejeque iimibachuudi siino saaji; amiihaico iicivaabo. Jaamo uujoho icahigo amiihai tolliro mihicaji. ⁴ Amiihairyo magaajacuui uujoho ofoohigoco, tolliro bu tahi ofoono jiihaico magaajahi icano, nooboro.

⁵ Jaanegui diiboco Tomas nuuhi: Aivojiiibo, magaajatihi ijoho efejihigoco; ¿Milli fine magaajajirahi toono jiihaico? nooboro.

⁶ Jaanegui Jesu nuuhi: Uujoho toono Jiihai, bu uujoho Miyaano, bu uujoho Fiivo icano. Idiinoro tafeenedi Moocaanivi mihifetejirahi. ⁷ Uco magaajahachiiji bu tolliro Guihirubico magaajahi. Jaaboco jisumitiro magaajacuui mahatyimecumaño.

⁸ Jaanegui Felipe diiboco nuuhi: Aivojiiibo, miihaicota dihifusu: Moocaanico maatyimemere siino dillucuuimo mihicaqui, nooboro.

⁹ Jaanegui Jesu diiboco nuuhi: Siicijetiro amiihaima icahicacuui. ¿Jaaruuboco nacu ijoho Felipe uco gaajatihica? Miuro uco aatyimeme bu Guihirubico atyimehi. ¿Milli jaabo uco: Moocaanico dihifusu, neehi?

¹⁰ ¿Nacu mimiyaavogotíhi uujoho Guihirubifaño iicanoco, bu Guihirubi tafaño iicanoco icano? Miuro amiihaico uujoho eneehicano, jilli tajebeitiuro eneehicano icatino. Guihirubi tafaño iicaabo dudicamaajeque moonihicahi. ¹¹ Uco mimiyaavogo, uujoho Guihirubifaño, diibo tafaño icano iicanoco. Jaabadiro bu siibadi omoonihicanoti uco mimiyaavogo. ¹² Miyantiro, miyantiro amiihaico neehi: Uco imiyaavogoobo bu tolliro mooniji uujoho omoonihicanoco. Jaabo imi janaanici moonijiibo uujoho jimaño icacutiibo Guihirubijaago efejimaño. ¹³ Jaamo amiihai paryi tamemeri Moocaanico midillunoco uujoho aciji uujoho Illifañodi Moocaani sihidi ejeevanoco miyaminaa igajaqui. ¹⁴ Jaamo siinoco tamemeri midillunoco uujoho aciji, nooboro.

Jesu Moocaani Gajaco Agalluuinoco Jiiheguhi.

¹⁵ Uco magajihachiiji tatyajiibaco imino momooni. ¹⁶ Jaadi uujoho Guihirubico dilluji amiihaijaago Igaija, miya Gaija iicaaboco igalluquui, amiihaico ijacusuqui. Jaabo amiihaima fahiijivaró icaji. ¹⁷ Jaaruuboco jiiinjeminaa gaayicijitirahi diiboco aatyimetimoro agaajatimaño. Jaanoti amiihai diiboco magaajacuui amiihaima diibo iicamaño. Jaabo amiihaifaño fahiijivaró icajiibo. ¹⁸ Amiihaico jeevesujitíhi jijovonoti mihicaqui; siino saaji amiihaijaago. ¹⁹ Fiiticuuno miyaminaa uco aatyimecuujitino: Jaanoti amiihai uco mahatyimeji. Uujoho ubuheemaño, jaabadiro bu amiihai mihicaji. ²⁰ Jaasumi amiihai magaajaji uujoho Guihirubifaño iicanoco. Jaabadiro bu amiihai tafaño mihicaji bu, uujoho amiihaifaño icaji icano. ²¹ Jaanoti tatyajiibaco imiyaavogoboro imino

omooniibo, uco agaijiibo. Jaabo uco agaijiiboco Guihirubi gaijiji, tolliro bu uujoho gaijiji icano, uujoho diitoma iicanoco igaajaqui.

²² Jaanegui saafi Juda onoo, jaarunaa Juda Iscariote icatiibo nuuhi: ¿Aivojiibo, milli jaabo mihaicoro difiico agaajasuuboro jinijeminaaco difiico gaajasujitih? nooboro.

²³ Jaanegui Jesu diiboco nuuhi: Uco agaijiibo taajico moonihi. Jaaboco Guihirubi gaijiji. Jaabojaaگو masaamisiro diiboma sano mihicaji.

²⁴ Jaanoti uco agaijiitibo, taajico moonitih. Jaano jino uujoho amiihaico ijiibeguehicabogo tabogoro icatino Guihirubi uco agalluuhiniibobogo.

²⁵ Jaanoco jilli amiihaico jiiibeguehicahi, jino amiihaima iicanohachuta.

²⁶ Jaarunaa tafañodi Moocaani Igaijaco agalluubo amiihaico fanoovaco jiiibegueji, tolliro paryi amiihaico uujoho eneehicanoco esaayujiiibo icano.

²⁷ Miiro jino amiihaico fitacuhi sajeebii mihicaqui. Tasajeebii ifiico

amiihaico acih. Jaaruno jinijeminaa isajeebiico aacibadi uujoho acijitih. Amiihai jeebiifañodi gaihuiba mihicadino, bu mihiguidino icano.

²⁸ Amiihairyo magaaacuuh amiihaico eneehininoco: Uujoho feegi. Jaaboro amiihaijaago siino saaji, nooboro eneehininoco. Miyaano uco magaijiruva imo imo mihicajirahi Guihirubijaa ofoonoco magaaamoro. Miiro Guihirubi tajanaanivivi sihidi jeevahi. ²⁹ Jaanoco amiihaico imegaviro neehi, tolli iicaacudi jaamo mimiyaaveguehi.

³⁰ Guenene amiihaima iimaacuujitih, jiije aivojiibo iji asaacumaño.

Jaaruubo tahallivi mityama chahahi. ³¹ Uco Guihirubi atajiibaubadi jino uujoho moonihi, jinijeminaa igaajaqui uujoho Guihirubico agaijinoco, nooboro diitoco: Magaaniivucu, jinooti mufuucuqui, nuubo.

Ifahaafe Ifahoovi Icanicibadi Miihai Mihicahi Jesufañodi.

15 Uujoho imiyacoochai, añiminaa baacu coohaibadi iicaabo. Jaacoochai abajaabobadi iicaabo Guihirubi. ² Miiro baacu coohai aafene iimitihaafejeque iquitimoro agavaracunicibadi, tolliro uco gaayicicurumo imitino iicamoro taajico iguiraatusunimoco Guihirubi gavaracuji. Jaanoti iguiraatusunimoco tooco aafene onooa aafejeque imibachunicibadi Guihirubi imibachuji janaanici siino iguiraatusuqui. ³ Jaanoti amiihai mimihiinivaficuutih amiihaico ijiibeguehicacuunofañodi. ⁴ Jaanegui uuviro mihica uujoho amiihaivi icaqui icano. Miiro oono basuta aafe ifahooti ihiinocinitihaafe iinoro noovajitirahi. Jaabadiro bu amiihai mihicaji uuti mihicatihachijji.

⁵ Miiro uujoho ifacoochai. Jaanoti amiihai ifahaafene; uuma iicaabo, bu uujoho diiboma iicaabo icano sihidi noovasuhi. Jaanoti uuti ijeevadi mihicahachijji aivo milliba momoonijitirahi. ⁶ Jaabo uuti icatiibo buhi gañicafeteji iimitihaafejeque iquiticimoro buhi agañiinicibadi. Jaano ifigatyonoco ananimoro ciijigaifaño agañino nifetefihi.

⁷ Jaanoti uuti mihicahachijji taaji amiihaima icaji. Jaachijji paryi mihimogonoco midilli amiihaico aciqui. ⁸ Miiro amiihai sihidi monoovasuhachijji Moocaani cahacisucafeteji. Jaachijji amiihai miyaanoro tajiibogominaa mihicahi. ⁹ Guihirubi uco agaijibadiro, bu amiihaico uujoho gaijiji. Jaanegui amiihaico agaijinofañoro mihica. ¹⁰ Tatyajiibaco imino momoonihachijji amiihaico agaijinofañoro mihicaji; Uujoho Guihirubi tajiibaco imino omoonimaño diibo uco agaijinofañoro iicabadi.

¹¹ Jilli amiihaico neehi, tahimohica amiihaima iicaqui. Jaaneri jaamo imo imo mihicahi. ¹² Jaano jino amiihaico uujoho atajiibano:

Fahigova magaijicasi, amiihaico uujoho agaijibadi. ¹³ Janaanici aivo gaijima mihicano; miino gataavominaafihallivi mofiico mahacino. ¹⁴ Jaabadi amiihai tañahabomi mihicaji, uujoho amiihaico atajiiibanoco momoonihachijii. ¹⁵ Amiihaico tajeecivominaa nuucuujiitihi, miiro jeecivominaafi gaajatatihi ihaivojiiibo omooninoco. Jaaneguiiha jino amiihaico tañahabomi neehi; paryi Guihirubiti agaajahininoco amiihaico agaajasumaño. ¹⁶ Amiihai uco mihicutiitihi. Jaanoti uujoho amiihaico iciuhi. Jaaboro amiihaico ficuuhi, toonoco mofoomoro sihidi miguiratuusuqui. Jaanoco suufenitimo mihica; Jaamo tamomofenedi Moocaanico siinoco midillunoco amiihaico ihaciqui. ¹⁷ Jino amiihaico atajiiibano: Fahigova magaijicasi.

Jiinijeminaa Amiihaico Jiiheveji.

¹⁸ Jiinijeminaa amiihaico jiihevehachijii magaaja, amiihai imegaro uco jiiheveneque. ¹⁹ Amiihai jiinijeminaa mihicaruva amiihaico jiinijeminaa gaijijirahi. Jaanoti uujoho jiinijeminaafeeneti amiihaico iciuhi. Jaamaño jiinijeminaa amiihaico jiihevehi, jiinijeminaa mihicacuutimaño.

²⁰ Mehesafoto amiihaico eneehininoco, miiro jeecivominaafi ihaivojiiibo janaanivivi jeevatatihi. Uco icaruno jiiheveve, imi amiihaico jiiheveji. Amiihaico jiiibeguehicanoco imino momoonihachijii, tolliro bu amiihaiñi ficucafeteji. ²¹ Jilli tahalliti amiihaico moonijimo, uco agalluuboco agaajatimaño.

²² Uujoho saahinitiruva, bu diitoco jiiibeguehicitiruva icano iimitico gaajajitirumo. Jaanoti jisumi milliba eneejiruno chahacuhi iimitico agaajasucumaño. ²³ Miiro uco jiihegueme, bu tolliro Guihirubico jiiheguehi. ²⁴ Uujoho diitofeenevi miihaiñooba eheetavotinoco sihidi ejeevanoco eetavehicitiruva iimitima chahajirumo. Jaanoti toono sihidi ejeevanoco atyimehicacuurumo uco jiihevehi, bu Guihirubico jiiheveve icano. ²⁵ Jaaruno ticovono icatino jilli diito tajiiba aamefaño onono imiyaavequi icano: Sicamañohalliti uco jiiheveve, onono.

²⁶ Jaarunaa Jacusuminaafico uujoho Guihirubifañodi agalluubo miyaano Gaija asaadi, diibo uti iimaaji. ²⁷ Jaasumi tolliro amiihai uuditi mijiiibegueji, iticonitiro uuma mihicahicamaño.

16 Jilli amiihaico neehi jinejeba amiihaico dugaacusutino iicaqui. ² Amiihaico gañijimo sinagogajanofañoti. Tolliro bu icajino cajaanoyhacho amiihaiti iguijenimo esamaaji: Jilli omoonineri Moocaanidi fine imino moonihi, noomoro omoonimo. ³ Jilli moonijimo Guihirubico agaajatimaño, uco agaajatimaño icano. ⁴ Jaanoco jilli amiihaico neehi. Jaamo tolli iicacuudi magaajahi uujoho toonoco amiihaico eneehinicuunoco.

Moocaani Gaija Eheetavono.

Jilli iticoni amiihaico nuutihi, amiihaima icaumaño. ⁵ Jaaruubo jisumi fuucuji uco agalluubojaa. Jaaboco amiihaiti saatohoba midillujitihi: ¿Cuca feeji? noomoro. ⁶ Jaarunaa iticoni tolli amiihaico unueneri mihidaasuvuui. ⁷ Jaarunaa miyaanoco amiihaico neehi: Aivo amiihaidi imino uujoho ofoono. Jaanoti footiruva Jacusuminaafi amiihajaa saajitirahi. Jaanoti ofooboro amiihajjaa galluuji. ⁸ Jaadi diibo asaadi jiinijeminaaco gaajasujiibo imitiminnaa iicanoco, bu tolliro iticovono jiihai iicanoco, bu diitoco Moocaani udugaacujinoco icano. ⁹ Jaabo:

Diito imitiminaa iicanoco, neeji uco diito imiyaavogotimaño. ¹⁰Tolliro bu gaajasujiibo iticovono jiihai iicanoco, uujoho Guihirubi iicahigo ofoomaño. Jaaboco amiihai siino uco mahatyimecujitihí. ¹¹Tolliro bu gaajasujiibo Moocaani udugaacujinoco, diibo jiije aivojiiibo iicaabo ijico ciijigaifaño igañiiqui ificucumaño icano.

¹²Sihidi amiihaico eneejiruno icarahi. Jaarunoco jisumi amiihai magaajajitirahi. ¹³Jaannoti miyaano Gaija asaadi amiihaico miyanotiro jiiibeguejiibo. Jaaruno ijeebiitiro jiiibeguejitiibo Moocaani onoonoco jiiibeguejiibo, tolliro bu amiihaico gaajasujiibo ufucu iicajinehejeque icano. ¹⁴Diibo uco bocigusuji taaño iicanoti agaayiciiboro amiihaico gaajasujiibo. ¹⁵Guihirubima iicano paryi taaño. Jaamaño uujoho neehi: Moocaani Gaija taaño iicanoti agaayiciiboro amiihaico gaajasujiibo, nooboro.

Idaasuno Mihicarumo Imo Imo Miminifeteji.

¹⁶Goovacujino amiihai uco siino atyimecutimo mihicano. Jaarunobuunati goovajisutinoti siino uco mahatyimeji Guihirubijaago efeejimaño, nooboro.

¹⁷Jaaneguiiha jiiibogominaati saatoho noocasiuhi: ¿Milli fine eneejirunoco miihaico noobo: Goovacujino uco atyimecutimo mihicano, siino bu goovajisutinoti siino uco mahatyimeji Guihirubijaa efeejimaño? onoono ¹⁸neehicaumo: ¿Milli eneejiruno goovajisujitino, bu goovajisujino onoono? Magaajatihi ihiimaanoco, noomoro.

¹⁹Jaanoco Jesu diiboco diito idillujirunoco agaajaciuboro diitoco nuubo: Sanomiro midillucasihí, uujoho goovajisujino uco atyimecutimo mihicano, bu toonobuunati goovajisutinoti siino uco mahatyimeji onoonoti. ²⁰Miyanotiro, miyanotiro amiihaico neehi: Mataacasimoro idaasuno mihicaji. Jaaneri jiije miyaminaa imo imo icaji. Jaaruno amiihai idaasu imo icati minifeteji. ²¹Miuro gaigo eseemevajisumi idaasuno minifotogo ihaivofucuvi iifotomaño. Jaarugo eseemevacuunobuunati ihaivoco esicinicuutatigo jiiinjehallivi sisee seemene ifiiveneri imo imo iicamaño. ²²Jaabadi amiihai jisumi mihidaasuvehi. Jaarunaaca amiihai siino uco mahatyimeneri amiihai jeebiino sihidi imo imo minifeteji. Jaano imo icaco miihaiñooba amiihaiditi udumitiicijitino.

²³Jaasumi uco siino midillucujitihí. Miyanotiro amiihaico neehi: Guihirubi amiihaico aciji fanoovaco tamomofenedi midillunoco.

²⁴Jisumihiica amiihai jinejebaco midillutihica tamomofenedi: Midillu. Jaamo magaayicihí. Jaamo sihidi imo imo mihicahi.

Jesu Jiinijeque Guiinoniuhi.

²⁵Jilli amiihaico neehi siinovi ooviciboro. Jaarunofaño tufucu gaseji siino amiihaico siinovi ooviciboro jiiibugucujitino. Jilli foovonoro amiihaico Guihirubiti jiiibugucujino. ²⁶Jaasumi amiihaihallivi Moocaanico uujoho dilluji amiihaico nootihí: ²⁷Guihirubiro amiihaico gajihí, uco amiihai magajimaño, tolliro bu uujoho Moocaaniti asaahininoco mimiyaavogomaño icano. ²⁸Uujoho Guihirubiti ihiinehiniiboro jiijehallivi saahinihi. Jaaruubo siino jiiinijeque ejeevesuuboro dojicuviro Guihirubijaago fuucuuji, nooboro.

²⁹Jaanegui jiiibogominaa diiboco nuuhi: Jisumi naha foovono diimaahi siinovi oovicitiiibo. ³⁰Jisumi naha jari magaajacuuhí ijoho fanoovaco agaajanoco. Jaamaño miihaiñooba ico dillucujitirahi, bu miihai imino magaajacuuhí ijoho Moocaaniti asaahininoco, noomoro.

³¹ Jaanegui Jesu diitoco iimusuuhi: ¿Jaanegui nacu jari jisu mimiyaaveguehi? ³² Tufucu jino gasecui; fine tusu mihicacuui, jino amiilai fahigovavi safisa amiilai naagonovi magavaranamaaijino tacojiti uco mejevesumoro. Jaaruubo uujoho uuro icajitihi Guihirubi uuma icaji. ³³ Jilli amihaico neehicahi. Jaamo uuvi sajeebi mihicahi. Jiinjehallivi sihidi idaasuma mihicaji. Jaarunofaño ucoro mehesicini, uujoho jiinijeque guiinonicuui, nooboro.

Jesu Ijibogominaahallivi Moocaanima Iimaahi.

17 Jilli Jesu unuobuunati, niquejeque emeeciuboro, nuuhi: Guihihi, tusumi mihicacuui; Daachico cahacisu, tolliro bu Daachi ico icahacisuqui. ² Hjóho Daachico diijico daacih paryi miyaminaahallivi. Jaamo paryi ijoho uco adaacimoco ifinjitino fiivoco aciqui. ³ Jaano jino ifinjitino fiivo, idiiboro ijoho miyaabo Moocaani idiicanoco agaajano, bu tolliro Jesucristoco ijoho agalluuhiniiboco agaajano icano.

⁴ Uujoho ico jiinjehallivi bocigusuhi; imivucuui uco atajibahininoco omoonihicaabo. ⁵ Jaaneguiiha, Guihi, uco dicojivi bocigusu jiinije fiivutinaacaro dicojivi uco obocigusubadi.

⁶ Jiinjeminaati idiiciiboro uco adacimoco dimomoco gaajasucuui. Dita iicahinimoco uco daacihinihi. Jaamo imino diijico ficuhi. ⁷ Jisumi gaajacuumo paryi uco adaacihininó iiti asaanoco. ⁸ Diijico uco adaacihininoco diitoco acihicacuui. Jaanoco agaavogomo gaajacuumo miyaanoro uujoho iiti asaahininoco. Jaamoro miyaavogomo miyaanoro ijoho uco agalluuhininoco.

⁹ Jaamohallivi ico dilluhi, Famoohalliviro jiinjeminaahallivi ico dillutihi, dita iicamoco uco adaacihinimohalliviro dilluhi. ¹⁰ Miíro paryi taaño iicano diino, tolliro bu diino iicano taaño icano. Jaamofañodi uujoho cahacisucafetehi.

¹¹ Jaaruubo uujoho jiinjehallivi icacuujitihi. Jaanoti diito jiinjehalliri icaji. Jaanoti uujoho dijaa feeji. Jaanegui, Guihi, ijoho idiimiibo, uco adaacihinimoco dimityari toomo, saafiibadiro diito iicaqui iima misi saafiuro mihicabadi. ¹² Uujoho jiinjehalliri iicahinisumi diitoco teemehicahinihi dimityari uco adaacihinimoco imino teemehinihi. Jaamaño saafiuro diitoti mitatíhi; idiiboro johono imitacuubo Caatinihaamefaño onoono imiyaavequi.

¹³ Jaaruubo jisumi dijaago fuucuui. Jilli neehi jino jiinjehalliri iicanohachutahiica tahimohicari diito tolliro imo imo iicaqui. ¹⁴ Miíro diijico uujoho diitoco acicuui. Jaarumoco jiinjeminaa diitoco gaayicitíhi jiinijeoto iicatimaño, uujoho bu jiinjeminaafi iicatimaño icano. ¹⁵ Jaanegui diitoco jiinjehalliti diiciqui ico dillutihi. Diitoco ijiti dihiifiniciquiro ico dilluhi. ¹⁶ Jaamo diito jiinjeminaa icacuumo uujoho jiinjeminaafi iicatibadiro. ¹⁷ Jaamoco iguiiharo ijeevadi ficu miyaanofeenedi, diijibogo aivo miyaano. ¹⁸ Hjóho uco jiinjeminaafeenevi agalluuhinibadiro, bu uujoho diitoco jiinjeminaafeenevi galluui. ¹⁹ Jaamaño uujoho diitofañodi uuro tafico iidiuro ijeevadi ficuui. Tolliro bu diito iidiuro ijeevadi ificucafetequi miyaanofeenedi.

²⁰ Diitohalliviro ico dillutihi, tolliro bu diito jibogofeenedi uco imiyaaveguejimohallivi ico dilluhi, ²¹ sano famooro saafiibadiro misima iicaqui; Guihi, ijoho uuma, bu uujoho iima icano mihicabadi iicaqui, jiinjeminaa imiyaaveguequi ijoho uco agalluuhininoco. ²² Diitoco acicuui,

uco adaacihinino bociyomonoco, sanobadiro iicaqui iima misi sanooro mihicabadi icano. ²³ Uujoho diitofaño, ijoho tafaño icano mihicaqui diito sanobadiro iminifetequi. Jaanofañodi jiinijeminaa igajaqui ijoho uco agalluuhininoco, bu diitoco agaijinoco, bu uco agaijinoco icano igajaqui.

²⁴ Guihi, imeguehi uco adaacihinimo uujoho iicahigo tolliro icano uco bocico adaacihininoco ihatyimequi, jiinije fiivutinaacaro uco ijoho agaijumaño. ²⁵ Guihi, miyaano, ico jiinijeminaa agaajatimo. Jaanoti uujoho ico gaajahi, tolliro bu jito gaajacuui ijoho uco agalluuhininoco. ²⁶ Jaamoco gaajasuhicacuui dimomoco. Jaarunoco janaanichiica gaajasuji ijoho uco agaijino diitofaño iicaqui, bu uujoho diitoma icaqui icano.

Jesuco Agaayicino.

(Mt 22.47-56; Mr 12.43-50; Lc 22.47-53)

18 Jilli unuoboro Jesu ijiiibogominaama fuuhi Cedro onoohigayi onegueehi iicaubajigayi tuhiguiino diitoma fuubo. ² Tolliro bu Juda diiboco aaciujiibo tomaño gaajauhi fahijivaro Jesu tobajijaago ijiiibogominaama efeehicaumaño. ³ Jaanegui amocasiminaa, temploja toomominaa icamoco fariseomi, sacerdotemi aivojito icamo agallumoco Juda iiciuboro satyuuhi. Jaamo fuuhi ihaamiganoma, iniisuganoma, cuugahuneri, cijigaimecuneri icano. ⁴ Jaanoco Jesu paryi gaajacuui diiboco omoonijinoco. Jaaboro imegaviro diitoco nuubo: ¿Miico amiihai miguiinehi? nooboro.

⁵ Jaanegui diiboco iimusumo: Jesu Nazareoboco, noomoro.

Jaanegui Jesu diitoco nuuhi: Eti du uujoho diibo, nooboro. Jaamofaño icaubo Juda Jesuco igaayiciqui diitoco isiiguubo. ⁶ Jaamoco Jesu: Uujoho diibo, unuuneri diito ibujinaagoviro aifuumo jiinijehallivi. ⁷ Jaadi Jesu siino diitoco dilluui: ¿Miico miguiinehi? nooboro.

Jaanegui diito nuuhi: Jesu Nazareoboco, noomoro.

⁸ Jaanegui Jesu nuuhi: Amiihaico duhu: Uujoho diibo, nuucuui. Uco miguiinohachijji taca jitoco mejeecivedino, nooboro. ⁹ Jilli nuubo: Uco adaacihinimoti saafiiba mitatili, unuuno imiyaavequi. ¹⁰ Jaasumiro Pedro iniisugaco ifajutafañoti iguiyicuboro saafiico buiyaacuui, jahi saafi Malco onoobo sacerdotemi aivojiibo jeecivominaafi nijimehuco quiticisuui imiyanaagomehuco. ¹¹ Jaanegui Jesu Pedroco nuuhi: Diniisugaco dojicuviro diihacu. ¿Nacu ijoho gaajatili idaasuno iicaqui uco Guihirubi atajiiibanoco? Jaanoco bu, ¿milli jaabo uujoho: Chahano, neejirahi? nooboro.

Jesuco Sacerdotemi Aivojiibo Imegavi Asatyuno.

(Mt 22.57-58; Mr 12.53-54; Lc 22.54)

¹² Jaasumiro ihamocasiminaa, diito aivojiiboma, bu judiomi sisiminaa icamo Jesuco agaayicumoro sisiuhi. ¹³ Jaamoro ticoniimo Jesuco Anas onoobo Caifas baabojaago asatyuno tusumi Caifas sacerdotemi aivojiiboti iicaumaño. ¹⁴ Jaabo diibo Caifas judiomico afajiniubo: Imino saafiuro faacuumihalliviro iguijevenc, nooboro unuubo.

Pedro Anas Goohasifaño Icauhi.

(Mt 22.69-70; Mr 12.66-68; Lc 22.55-57)

¹⁵ Jaabo dojicuti fuumisi ijiiibogominaatisi, Simon Pedro, bu saafi icano. Jaabo saafiu sacerdotemi aivojiiboco agaajacuubo. Jaamaño diibo

Jesuma jicafutuuhi sacerdotemi aivojiĩbo goohasifaño. ¹⁶ Jaarunaa Pedro iguhugaviro fitafutuuhi. Jaanegui diibo sacerdotemi aivojiĩboco agaajaubo ufuuboro iguhuga toomominaagoma ihiimauboro Pedroco fañovi jiĩhacuuhi. ¹⁷ Jaanegui diigo Pedroco nuuhi: ¿Nacu iijoho tolliro diibo jiĩbogominaafi idiicaabo? noogoro.

Jaanegui diibo nuuhi: Chahano uujoho diibo icatíhi, nooboro.

¹⁸ Jaanaa isiicuneguiha cijigaico eebasuumoro feemehicaumo jeecivominaa, sisimínaa icano. Jaamofeeneri tolliro bu Pedro icauhi efeemeubo.

Anas Jesuco Dilluhicauhi.

(Mt 22.59-66; Mr 12.55-64; Lc 22.66-71)

¹⁹ Jaanaa sacerdotemi aivojiĩbo Jesuco dilluhicauhi iijibogominaaditi, iijibogoti icano.

²⁰ Jaanegui Jesu diiboco iimusuuhi: Uujoho foovono iimaahicahi. Fahijivaro miyaminaa imefeenevi sinagogajanofaño, templojafaño icano. Fahijivaro jiĩbeguehicahi famooro judiomi iigaivonicijahajefaño uujoho toovono iimaahicatíhi. ²¹ ¿Collíhi jaanoco uco dilluhi? Diitoco dillu, uujoho ihiimaahicanoco uguubuhicamoco. Diito gaajahi uujoho eneehicanoco, nooboro.

²² Jesu jilli diiboco unuunegui, saafi sisimínaafi Jesuco ihimeti gabacuuhi: ¿Nacu tolli iijoho aivo diimusuhi sacerdotemi aivojiĩboco? nooboro.

²³ Jaanegui Jesu diiboco iimusuuhi: Imitino ihiimaahachiĩji, enecata dinoo. ¿Cono nacu imitino onoono? ¿Collíhi jaabo uco daamihi? nooboro.

²⁴ Jaanegui Anas Jesuco sisiciniuboco sacerdotemi aivojiĩbo Caifasjaago galluuhi.

Pedro Jesuco Siino Tuunamaaiuhi.

(Mt 22.71-75; Mr 12.69-72; Lc 22.58-62)

²⁵ Jaanaa Pedro julleecinĩbora feemehicauhiica diitoma. Jaaboco nuumo: ¿Nacu iijoho diibo jiĩbogominaaobo diicatíhi? noomoro.

Jaanegui Pedro tuunamaaiuhi: Chahano uujoho diitoobo icatíhi, nooboro.

²⁶ Jaanegui sacerdotemi aivojiĩbo jeecivominaafi nuuhi: ¿Jaaruno du Olivohono icagajiguino ico uujoho diiboma atyimehinihi? nooboro. Mĩro Pedro diibo yoobo nijimehuco Olivohono icagajiguino iquiticiubo.

²⁷ Jaarunaa Pedro siino tuunamaaiuhi. Jaasumiro ivi catava ojicuuhi.

Pilato Imefeenevi Jesuco Satyehi.

(Mt 22.1-2, 11-31; Mr 12.1-20; Lc 22.1-25)

²⁸ Jaamoro Jesuco satyuumo Caifas iijati tomañoaivojiĩbo iijajaago. Jaanaa sesevecuuno. Jaanegui judiomi toojafaño jicafutuutimo ijeevamaje onoobadi imitiri ijeebiico imihininĩumoro Pascua machuco amachuujitiruneguiha. ²⁹ Jaanegui aivojiĩbo Pilato ihiinuuboro diitoco nuuhi: ¿Jinejhalliti diiboco misivahi? nooboro.

³⁰ Jaanegui iimusumo: Gaicaauminaafi iicatiruva ico mahacijitirahi, noomoro.

³¹ Jaanegui diitoco nuubo: Amiihairyo masatyomoro amiihai tajiiba onoobadi momooni, nooboro.

Jaanegui judiomi diiboco iimusuuhi: Miihai judiomi, miihaiñoobaco milliti magaicaujitirahi, noomoro.

³² Jilli miyaavuuno, Jesu jilli guijeveji, nooboro eneehicauno. ³³ Jaadi siino Pilato fañoovaji ijicafutuuboro tahi Jesuco ocoovauboro dilluubo: ¿Hijoho naa judiomi Aivojiibo? nooboro.

³⁴ Jaanegui Jesu iimusuuhi: ¿Dijeebiitiro nacu tolli uco dilluhi? ¿Nacu sita uuditi ico tolli neehi? nooboro.

³⁵ Jaanegui Pilato diiboco nuuhi: ¿Nacu uujoho judiomioobo? Chaha, siicumioobo. Miiro diijiinjeminaaro, sacerdotemi aivojitoma ico uco acihi. ¿Jinejeque jana moonihi? nooboro.

³⁶ Jaanegui Jesu diiboco iimusuuhi: Jijeono tahaivoji icatihi. Jijeono tahaivoji iicaruva tajeecivominaa tahalliti icajirahi judiomi usefano uco acitimo iicaqui. Jaanoti tahaivoji jijeono icatihi, nooboro.

³⁷ Jaanegui Pilato diiboco nuuhi: ¿Jaaneguiihacuva ijoho aivojiibo? nooboro.

Jaaneguiiha Jesu diiboco iimusuuhi: ¿Hijoho du eti, uco aivojiibo, neehi? Tooneguiiha uujoho ifiivehiniibo jiihahallivi saahinihi miyaanocoro neequi. Jaano miyaano iicanoco paryi agaajamo uujoho onoonoco guubunichihi, nooboro.

³⁸ Jaanegui Pilato diiboco nuuhi: ¿Jineje nacu miyaano? unuuboro siino Pilato judiomijaago saauhi diitoma ihiimaavaubo. Jaaboro diitoco nuubo: Diibovi uujoho iimitinobaco atyimetihi, nooboro. ³⁹ Miiro amihihai amihihai jeevamaajefi uujoho Pascua jiihbaimosumi saafiiti civojaminaafiti isinaayuno. Jaaneguiiha, ¿naa mihimeguehi judiomi Aivojiiboco isinaayunoco? nooboro.

⁴⁰ Jaanegui famooro sefano coovadiivuuhi: Diiboco sinaayujitihi, Barrabacoro sinaayu, noomoro. Jaabo Barraba nanivaminaafiu.

19 Jaanegui Pilato Jesuco iiciuboro aamisuuhi. ² Jaadi amocasiminaa januutuno coohaiñooco minihaiti eheetavuumoro iinigaivi diiboco javucaruumo. Jaamoro bu diiboco jiihacuumo aivojiibo gaachehubadi gachicohai deecano tifaibadi itifai iicachehuco. ³ Jaamoro diiboco sahaaguehicaumo: iJudiomi Aivojiibo Diica! noomoro, diiboco ihimefano ganiicihicaumo.

⁴ Jaanegui Pilato siino asaaboro diitoco nuuhi: Memeeeci, eneeacu diiboco isivi sivaqui, jaamo magajahi diibovi iimitinobaco uujoho aatyimetinoco, nooboro.

⁵ Jaanaa Jesu iinovauhi ijanuutuno minihaima, igaachehu tifaibiha iicachehuma icano. Jaanegui Pilato nuuhi: iJaani diibo! nooboro.

⁶ Jaaboco sacerdotemi aivojito, bu isisiminaa icamo aatyimeumoro sefano coovadiivuumo: iDiiboco imohobujehallivi metetecu! iMetetecu! noomoro.

Jaanegui Pilato diitoco nuuhi: Eti tahi masatymoro metetecu. Jaanoti uujoho diibovi iimitico atyimetihi, nooboro.

⁷ Jaarunofano judiomi diiboco iimusuuhi: Miihaima icano tajiiba jaano onoobadi guijevejiibo imooniqui ijeebiitiro: Uujoho Moocaani Seemene, neehicaabo, noomoro.

⁸ Jilli diito unuunoco Pilato uguubuuboro janaanici aivo iguiubo.

⁹ Jaaboro siino ijafaño ijicafutuuboro Jesuco dilluubo: ¿Cuucatiobo ijoho? nooboro. Jaarunoco Jesu iimusucuutihi.

¹⁰ Jaanegui diiboco Pilato nuuhi: ¿Uco diimusujitirahi? ¿Nacu gaajatihhi ico etetecusujiruno, isinaayujiruno icano mityama iicanoco? nooboro.

¹¹ Jaanegui diiboco Jesu iimusuuhi: Tahallivi mityabama chahajirahi ico Moocaani ihacitiruva. Jaamaño ico uco aaciibo aivo dijanaanici imitima icahi, nooboro.

¹²Tolli unuunoma iicaabo Pilato diiboco isinaayuqui moonihicauhi. Jaarunaa judiomi sefano neehicauhi: iDiiboco isinaayuhachiiji aivojiibo Cesar nahaboniminaafi diicatihi! Miiro: Uujoho aivojiibo, onoomo Cesarminaafiti minifetehi, noomoro.

¹³Jaanegui Pilato diito tolli unuunoco uguubuuboro Jesuco isivi isivauboro casivuubo ihaivoji icagahallivi. Jaano hebreomi iijiri Gabata, onoono guisibano nicuta eneejiruno. ¹⁴Jaasumi Pascua jiiibaimo iicaujino fiiticuuih gadiciibarucuu iicauno. Jaaboro Pilato judiomico nuuhi: iJaani amiihai Aivojiibo! nooboro.

¹⁵Jaarunofaño diito sefano coovadiivuuih: iJaafa guijeveebe! iJaafa guijeveebe! iTetecu! noomoro.

Jaanegui Pilato nuuhi: ¿Amiihai Aivojiiboco jaabo tetecuji? nooboro.

Jaarunofaño sacerdotemi avojito iimusuuih: Mohaivojiibo Cesar uufocovi sifi mohaivojiibo chahahi, noomoro.

¹⁶Jaanegui diito usefaño diiboco jeevesuubo itetecuqui. Jaaboco iicumoro satyuumo.

Jesuco Etetecuuno.

(Mt 22.32-44; Mr 12.21-32; Lc 22.26-43)

¹⁷Jaadi Jesu fuucuuhi icubujeque agafaiyiicinihaboro nigaiipaajebai onoomañovi. Jaanoti hebreomi iijiri Golgota onobaivi. ¹⁸Jaamañovi diiboco tetecuumo, tolliro bu miimisiicico tetecuumo icano. Jaamisifeenevi Jesuco ficuumo. ¹⁹Jaabo Pilato imomoco acaatiniuboro Jesu guijeve imohobujevi ficusuuih: JESU NAZAREOOBO JUDIOMI AIVOJHBO onoonoco. ²⁰Jaanoco guiraamo saatoho judiomi toonoco meeciuih. Jesuco etetecuumaño tuucuumiti ifiitiumaño. Jaano toono imomo caatiniciniuhi hebreo iijiri, griego iijiri, latin onoojiri icano. ²¹Jaanegui judiomi sacerdotemi avojito Pilatoco nuuhi: Judiomi Aivojiibo nooboro, caatinidino. Jilli: Judiomi Aivojiibo uujoho, enehicaabo nooboro, caatini, noomoro.

²²Jaarunofaño diitoco Pilato iimusuuih: Acaatinibadiro icacuujino, nooboro.

²³Jaamo ihamocasiminaa Jesuco etetecuunobuunati Jesu gachehuco dugaacuumo sano nahabovacasidino. Jaamoro sanohosa iticovovi ifocasiumo. Tolliro bu icamooja falluuratino sadaahere caamoti guinovi niiciniujaco iicumoro ²⁴noocasiumo: Jichehuco masii ifocasitimoro tochehuhallivi suerteque meheetavequi: ¿Naa cajaan tochehuo iciji, noomoro. Jilli mooniumo Caatinihaamefaño onoono imiyaavequi: Tagachehuco ifocasiumo. Jaamoro tacamoojahallivi suerteque eetavuumo, onoono. Jaabadi jilli ihamocasimi mooniuih.

²⁵Jaanaa Jesuco etetecuuboguiino icahicaugo seeji, bu diigo nago Maria onooگو Cleofa taaba, bu Maria Magdalena onooگو icano. ²⁶Jaanaa Jesu seejico aatyimeuboro, bu tolliro aivo agajihicaubo ijiibogominaafico ihuufocori icauboco aatyimeuboro seejico nuubo: Gaha, diiburucuji daachibadi iima iicajiibo, nooboro.

²⁷Jaadi bu tolliro ijiibogominaafico nuubo: Diigurucuji diiseejibadi iima iicajigo, nooboro. Jaasumitiro diigoco ijiibogominaafi iijafaño satyuuih.

Jesu Iguijeveuno.

(Mt 22.45-56; Mr 12.33-41; Lc 22.44-49)

²⁸Toonobuunati Jesu idudicamaaqueque iimivucuunoco agaajaciuboro nuuhi: Adujirahi, nooboro Caatinihaamefaño onoono imiyaavequi.

²⁹ Jaamañeri guirihillufañu icaufaihu iquigaño aivofaihu iidicufaihu. Jaafaihufañu faatata icanoco amatyusuomoro hisopo onooho usuho. Jaaho aafeque iiciumoro tootaatoco toohaafe nijequevi ificumoro diibo iijifaño cabuyaacuumo. ³⁰ Jaanoco Jesu aaduboro nuuhi: fvi paryi imivocafutucuuno, nooboro. Jaadi acanuvuboro gujivecuubo.

Jesu Mecuhuco Ahaamiuno.

³¹ Jaanaa Pascua jiiibaimo sesevedi iicacuujineguiiha. Tufucu jaguisifucu iicauneguiiha judiomi imuguutihi diito ifiino tubujejeviro icaunoco. Miuro diito jaguisifucuvi jinejeba aivo eheetavorahicautimaño. Jaanegui Pilatoco dilluumo saatohoco itajiiibaqui idiinoco agafaryucumoro diitoco toonoti sihigovi ificuuqui. ³² Jaanegui amocasimi asaumoro saafico idiinoco gafaryucuumo. Jaadi bu tolliro saafico mooniumo Jesu cojivi etetecuciniumisico. ³³ Jaadi Jesuvi ifutuurumaaca chuumucuubo. Jaanoma iicaumo diibo idiinoco gafaryucuutimo.

³⁴ Jaarunaaca diitoti saafi Jesu mecuhuco ihaamigari cafatyicaruuhi. Jaasumiro diibofañoti iinuuno tiijoho, nifaihu icano. ³⁵ Jaanoco aatyimeubo miyaanocoro jiiibeguehi. Jaabo gaajahi toono miyaano iicanoco. Jaamo amiihai tolliro bu mimiyaaveguehi. ³⁶ Jilli icauno Caatinihaamefaño: Dibacino quisicurajitihí, onoono imiyaavequi. ³⁷ Jaabadiro bu samañoohaamefaño noono: Cafatyicaruciniiboco mahatyimeji, noonoro.

Jesuco Iciiuno.

(Mt 22.57-61; Mr 12.42-47; Lc 22.50-56)

³⁸ Toonobuunati Jose Arimatea cuumioobo Jesuma efeehicauruubo judiomi ñihicuti toovono ufuuboro Pilatoco dilluubo Jesu ifiico ihiciqui. Jaaneguiiha Pilato: Jii, nuuhi. Jaaneguiiha ufuuboro Jesu ifiico icijeubo. ³⁹ Tolliro bu Nicodemo fuuhi iticoni Jesuma fucu ihiimaajeubo. Jaabo guiraano facicifaihuco sivauhi treinta kilo ticovovi. Tofaihuco mirra, aloe iicaneri eetavuuhi. ⁴⁰ Jaamisiro gaachehubaanoco tooneri afacicisumisiro Jesu ifiico miniuhi, judiomi jeevamaaje tolli iciinicibadi. ⁴¹ Jaano diiboco etetecuumañeri icauno bajigayi. Jaamañeri bohoji ciihoji icauhi miihaiñoobaco tohojifaño iciiutihoji. ⁴² Jaahojifaño Jesu ifiico ciiumisi tohoji tomañoti ifiitiumaño judiomi jaguisifucu iticovacuumeguiiha.

Jesu Siino Ubuheeteuno.

(Mt 22.1-10; Mr 12.1-8; Lc 22.1-12)

20 Jaanaa judiomi jaguisi iicauno sesevedi Maria Magdalena onogo Jesu ciihojjaa fuuhi fucugayiro civonaacaro. Jaago atyimeuhi iciihojico afabaacuuba iguiisiba sihigovi aacaubaco. ² Jaanegui Simon Pedro, bu saafi Jesu agaijihicaubo ijiibogominaafi icamisijaa ijinafatyuugoro diitisico nuuhi: Aivojiiiboco iciihojifañoti cuucahacho satyucuumo. Jaanoco magaatitihí, ¿cuucahacho fine ficuumo? noogoro. ³ Jaaneguiiha Pedromisi iciihojijaago ⁴ jinoomisiro fuuhi. Jaanaa saafi Pedro imeguro iciihojivi ifutuuihi. ⁵ Jaaboro tohojifañoico idijiivuboro emeečiubo atyimeuhi iminitaacoro. Jaaruubo tohojifaño fuutihí. ⁶ Jaanobuunati jari Simon Pedro gaseuhi diibo dojicuti. Jaabo tohojifaño ijicafutuubo atyimeuhi iminita tomañeriro acaaciniunoco. ⁷ Tolliro bu Jesu imeque iminiubaryu imino miniciniubaryu ijeevadi acaaubaryuco

atyimeubo. ⁸ Jaanegui bu tolliro saafi jicafutuuhi tohøjifaño, iticoni tohøjivi agasebu. Jaabo toonoco aatyimeuboro miyaavuguuhi. ⁹ Jaarumisi gaajautimisihica Caatinihaamefaño: Jesu iguijeevebe siino buheeteji, onoonoco. ¹⁰ Jaadi Pedromisi siino dojicuviro iijajaago uumicuuhi.

Jesu Maria Magdalena Onoogovi Jafeveuhi.

(Mr 12.9-11)

¹¹ Jaanaa Maria iinoro fitafutuuhi tohoji imega taagoro. Jaago taagoro dijiivuugo tohøjifañoco emeeciugo. ¹² Jaago atyimeuhi miimisiici Moocaani toomominaatisico sesechehunofaño icamisi giciniuhi saafi Jesu nigai iicaunaagonovi, jaanoti saafi itihai iicaunaagonovi icano icaumisico.

¹³ Jaamisi diigoco nuuhi: ¿Jinejeri jaago iijoho taahi? noomisiro.

Jaanegui diigo nuuhi: ¿Cuucahacho tahaivojiboco asatyomoro ificuuneri? noogoro ¹⁴ ibujinaagoco emeeciugo Jesuco atyimeuhi. Jaarugo diibo Jesu iicaunoco gaajautihi.

¹⁵ Jaagoco Jesu nuuhi: ¿Jinejeri jaago taahicahi? ¿Miico guinehi? nooboro.

Jaanegui diigo tobajigayi toomominaaficoro eesiciniumaño nuugo: Aivojiboco, iijoho baacho asatyoboro, ¿cuucahacho ficuuhi? Uco diibogo iicitogoro satyequi, noogoro.

¹⁶ Jaanegui Jesu diigoco dilluui: Maria, nooboro.

Jaanegui diigo diiboco emeeciugoro hebreomi iijiri nuuhi: Raboni, noogoro; Jiibogominaafi, eneejiruno.

¹⁷ Jaanegui Jesu diigoco nuuhi: Uco dudiicidino; uujoho caamo Guihirubijaago footihica. Jilliro foogo tañahabomico diibogoto: Guihirubi, bu tolliro amiñhaiti amiñhai Caani iicaabojaago feehi. Taacaani Moocaani iicaabojaago feehi. Jilli noogoro diibogoto, nooboro.

¹⁸ Jaanegui Maria Magdalena onooگو fuuhi iijibogominaajaago Jesuco aatyimeunoco, bu diibo unuunoco icano diitoco ijiibugutuugo.

Jesu Jiibogominaavi Jafeveuhi.

(Mt 22.16-20; Mr 12.14-18; Lc 22.36-49; Hch 1.8)

¹⁹ Jaafucuro iijicuuvi jiibogominaa igaiciniuhi samecufañoro judiomi ñihicuti iguhuganoco huhufono ofoboociumoro icauhi. Jahi Jesu ijicafutuuboro diitofeenevi ujulleveuboro diitoco dilluubo: Sajeebi mihica, nooboro.

²⁰ Tolli unuuboro diitoco iifusuubo ihuseneque etetecunopaajeneque, bu imecuhuti ahaamiupaajeque icano. Jaaneri jiibogominaa imo imo minifutuuhi Ihaivojiboco aatyimeumoro. ²¹ Jaadi siino Jesu diitoco nuuhi: Sajeebiima mihica; Guihirubi uco agalluubadiro bu uujoho amiñhaico galluui, ²² nooboro diitohallivi fuunaruubo. Jaaboro nuubo: Magaayici Moocaani Gajaco, nooboro. ²³ Jaamo cayaatyocohacho iimitico mubuusumo iimitima chahacuji. Jaanoti mubuusutimo imiti buusuracujitih, nooboro.

Tomas Miyaavogoti.

²⁴ Jaarunaa Tomasco Gaatyaba enehicaubo diitoma chahauhi Jesu diitovi ajafeveusumi. ²⁵ Jaaboco saatoho jiibogominaa jiibuguuhi: Aivojiboco mahatyimehi, noomoro.

Jaarunofaño Tomas diitoco nuuhi: Ihusenefaño diiboco etetecunopaajeneque aatyimeebere toopaajejefaño tahuseganiño

ijiihacutinohachuta, bu tolliro imecuhuti diiboco ahaamiupaajefaño
ijiihacutinohachuta miyaaveguejitihi, nooboro.

²⁶ Jaanobuunati sahuse juugahuseti mifucuci, safucu icano nigaciti siino
ijiiibogominaa igaivuuhi toojafaño. Jaasumi Tomas diitoma icauhi. Jaanaa
iguhugano kuhufono foboocinirunaa Jesu ijicafutuuboro diitofeenevi
ujulleveuboro diitoco dilluubo: Sajeebiima amiihai mihica, nooboro.

²⁷ Jaaboro Tomasco nuubo: Ifaaji ivi jisumi dihusegaico jinofaño diihacu.
Jaaboro jino tahuseneque meeci, bu juugavi saabo jino tamecuhufaño
dihuseque diihacu. Jaaboro mabañihi nootiibo, miyaavogo, nooboro.

²⁸ Jaanegui Tomas diiboco iimusuuhi: iTahaivojiiibo Moocaani! nooboro.

²⁹ Jaaboco Jesu nuuhi: Tomas jari uco adaatyimeebere miyaaveguehi.
Imino icajino atyimetirumo imiyaavogomo, nooboro.

³⁰ Tolliro bu Jesu sihidi ejeevanoonoco ijiiibogominaa imefeenevi
guiraano eetavehicauhi. Jaaruno jihaamefaño paryi caatinicinitino.

³¹ Jaanoti jinoocoro caatiniumo amiihai mimiyaaveguequi Jesu diiburucu
Cristo Moocaani Seemene iicanoco. Jaaboco mimiyaavogonofañodi diibovi
ifinijitino fiivoma mihicahi.

Jesu Jafeveuhi Sietedimo Ijiiibogominaavi.

21 Jaanobuunati siino Jesu ijiiibogominaavi jafeveuhi Tiberia
muuajijnivi. Jilli diitovi jafeveubo. ² Jaamo samañeriro icaumo
Simon Pedro, bu Tomasco Gaatyaba eneehicaubo, bu Natanae Cana de
Galilea onooicumioobo, bu Sevedeo seementisi, bu tolliro sitisi diitootisi
icamoco ³ Simon Pedro nuuhi: Uujoho fiiciteji, nooboro.

Jaanegui diito nuuhi: Tolliro miihai iima masaaji, noomoro fuumo
meenegari. Jaarumo tufucu saafiiba iciutum. ⁴ Jaanaa seseevacuunaaca
Jesu diitovi jafeveuhi jiiinigaibaahovi. Jaaruuboco ijiiibogominaa
gaajacititihidi diibo iicaunoco.

⁵ Jaabo diitoco nuuhi: ¿Sicafe, naa saafiiba mihicitihi? nooboro.

Jaanegui: Chahano, nuumo.

⁶ Jaanegui Jesu diitoco nuuhi: Amiihai sinicuuhuco amiihai meenegati
momiyanaagonovi magañi. Jaamo mihicitihi, nooboro. Jaanegui tahigovi
agañiiumo isinicuuhuco guiiyicicutitihidi itaava bociri sihidi ijivusumaño.
⁷ Jaanegui Jesu ijiiibogominaafico agaijhicaubo, Pedroco nuuhi:
iMohaivojiiibo jahi! nooboro.

Jaanegui Pedro Jesu jahi iicaunoco uguubuuboro igaachehuco
siyaavuubo, igaachehuco ujujuuvumaño. Jaaboro muuaifaño acutuubo.

⁸ Jaanaa sanoodimo ijiiibogominaa isinicuuhuco meenegari guicimoro
ijijnijaagovi sivaumo ijiniiti cien metrohachutaro iicaumaño. ⁹ Jaamo isivi
ihiinummo atymeuhi cijigaihalliri taavaabo gaaruciniibo aacaaboco
mahuma.

¹⁰ Jaamoco Jesu nuuhi: Toono taavaco mihicimoti juu misiva, nooboro.

¹¹ Jaanegui Pedro imeenegafaño ufuuboro isinicuuhuco isivi guiiyicubo
sihidi queefimo taavaco ciento cincuenta y tresdimo icaurumoma isinicuuhuco
gallivuutitihidi. ¹² Jaamoco Jesu nuuhi: Masaamoro mamachuva, nooboro.

Jaaruuboco ijiiibogominaati saafiiba dilluutitihidi: ¿Mijjoho ijjoho? noomoro
Ihaivojiiibo iicaunoco agaajumaño. ¹³ Jaadi Jesu asaaboro itaavaaboco
iiciuboro diitoco aciubo, bu tolliro imahuco aciubo icano.

¹⁴ Toonoma mifococi, safo icano icacuuno Jesu ijiiibogominaavi ajafeveuno
iguijeveubo siino ubuheeteunobuunati.

Jesu Simon Pedroco Atajiibauno.

¹⁵ Jaamo amachuunobuunati Jesu Simon Pedroco nuuhi: ¿Simon, Jona achi, uco gaijihi jino janaanivivi? nooboro.

Jaanegui Simon Pedro iimusuuhi: Jihi, Aivojiibo, iiro gaajacuui ico agaijinoco, nooboro.

Jaanegui Jesu diiboco nuuhi: Jaaneguiha taca oono toomominaafi ihoveja seemeque ojoobinicibadi oono uco imiyaavogomoco diibeguehica, nooboro.

¹⁶ Jaadi bu siino diiboco dilluubo: ¿Simon, Jona achi, uco gaijihi? nooboro.

Jaanegui Pedro iimusuuhi: Jihi, Aivojiibo, iiro gaajacuui ico agaijinoco, nooboro.

Jaanegui diiboco nuubo: Taañocota toomo ovejamico ootomonicibadi, nooboro.

¹⁷ Jaadi bu siino diiboco dilluubo: ¿Simon, Jona achi, uco gaijihi? nooboro.

Jaaneri Pedro idasuvuuhi diiboco mifocci, safo icano: ¿Uco gaijihi? nooboro idillucuneguiha. Jaaboro nuubo: Aivojiibo, iiro paryi gaajacuui ico agaijinoco, nooboro.

Jaanegui Jesu nuuhi: Taañocota diibeguehica ovejamico ojoobinicibadi.

¹⁸ Miyantiro, miyantiro ico neehi: Sicafehi idiicausumi digaachehuco idicafotooboro idiimoghigovi feehicauhi. Jaanoti amiyaabo idiicacuudi dihuseque gañiyciboco ico sita digaachehuco jihacuji. Jaamoro ico satyeyimo idiimogotiruhigovi, nooboro.

¹⁹ Jilli nuubo Jesu Pedro coyomo guijeveri iguijeveujinoco agaajasuubo neehicauhi. Tooneri Moocaani bocico agaajasuujinoco. Jaadi diiboco nuubo: iTadyojicuti disaa! nooboro.

Ijibogominaafico Agaijhicaubo.

²⁰ Jaanaaca Pedro idojicuco emeeciubo atyimeuhi Jesu agaijhicaubo ijibogominaafi idojicuti ufuunoco niinoono amachuusumi diibovi ifituuvuuboro: ¿Aivojiibo, cajaan ico aacijiibo? nooboro idilluubo.

²¹ Jaaboco Pedro aatyimeuboro Jesuco nuuhi: ¿Aivojiibo, jana jaaniji milli? nooboro.

²² Jaanegui Jesu nuuhi: Iimoghachiji icajiibo uujoho siino uhuuminohachuta. ¿Jaaruno iidi milli icatihi? Jaanoti ijoho tadyojicuti disaa, nooboro.

²³ Jilli diiboco unuunoco inahabomi jibocasiuhi: Diibo jibogominaafi fine guijevejitihi, noomoro. Jaarunofaño Jesu guijevejitiibo nuutihi. Iimoghachiji siino uhuuminohachuta icajiibo. ¿Jaaruno iidi milli icatihi? nuubo.

²⁴ Jaabo diibo jibogominaafi jinoco jibeguehica. Jaaboro caatiniubo. Jaanoco mihihi magaajahi diibo ijibogono miyaano iicanoco.

²⁵ Tolliro bu sihidi saneheje Jesu omoonihicauno icarahi. Jaanehejeque sanohosari paryi icatatiniruva uujoho onono fine paryi jinihalliri iicano aamenevi iifetejituruno.